



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com



TAPAK 9

SP aser BSP na den akokba tashi yariteptsü melunga lir: Rahul Gandhi



TAPAK 3

Assam-i party ajak tebilemdangba angadangtsüla: Mukul

VOL. XVI NO. 97 (ADOK 97)

DIMAPUR

YANGTEPNÜ (THURSDAY)

AENJETI (JANUARY) 24, 2019

5.00

R-Day nung shilem magitsü: NSF Ochimashi ken o nung alirtem meshimtsüla: NPRAAF

Kohima, January 23 (TYO): NESO nung adenba unit ka ama NSF-i India sorkar dang Citizenship (Amendment) bill 2016 anemba lenmang aisü ajanga metetdaksügo, ajisüaka India sorkari Lok Sabha nung iba bill agizük aser Rajya Sabha nunga anüingdaka lir, ta tanü NSF Tir, Kesosul Christopher LTU aser tongti tezülur, Imtiyapang Imsong nati sangdong ka ajanga metetdaksü.

"Anungji onoki iba bill anemba temaitsü sayua NSF-i January 26, 2019 nü India nung Republic Day anogomong nung shilem magitsü," ta sangdong nung shia lir.

"Iba dak sendakba nung

Federating Units aser Sub-ordinate tentet ajak dang pepei tesem nung iba anogomong nung shilem magitsü tetuyuba agutsür. Iba denji külemi shisaliok rejutem aser kaketshirtem danga R-Day anogomong sentong dak sendakba sentongtem aser sorkar maparen kecha nunga shilem magitsü atema tetuyuba agutsüdaksüner," ta kasa sangdong nung shia lir.

"NSF-isa Nagaland sorkar dang osangkakettem nung sangdong agutsüba mesüra oleplang agutsütepba ajanga nüburtem memangmagdaksüi sorkari iba bill pusemer asü anemer, ibaji dang sangdongang ta takhangba agutsür," ta NSF-isa metetdaksü.

Kohima, January 23 (TYO): Veterinary Doctor ka, shiba Deputation nung Additional project Director DOSE (Directorate of school education department. Govt. of Nagaland) inyaka liasü; tesülen Vigilance & Anti-Corruption Police Nagaland: Kohima-i October 5, 2018 nü jaokba shidi agutsü aser tangar nisung 14 den külemi Mid-day meal scheme dak sendakba ochimashi tai tongloksüba nung October 8, 2018 nü Sl. No 3 nung pa tenüng adokja lir, ta osang angazükogo, ta tanü Information & publicity wing NPRAAF-i sangdong ka

ajanga metetdaksü. "Sensaker school tanurtem atema mid day meal senotsü chitsübaji ken oji tulu, aser iba ken onungji aitsüra iba nisungbaji ita 6 tepoukdak ayutsü akok, mesüra küm 5 tashi atsülanga tepoukdak ayuba den külemi senchi achitsüa akok, mesüra temerenshi anaprongji agutsütsü akok; ibaji Prevention of corruption Act 1988 kübok Arrla 8, 9 nung shia lir," ta NPRAAF-isa metetdaksü.

"Iba ochimashi ken o ya maneni bushisüngdangdar, aser tang asüngdangyaba nisungbaji iba ken o nungi jenbua mali,

ajisüaka linük nung tematiba Administrative service- Indian Administrative Service (IAS) nung shimoktsü atema state sorkari pa tenüngji benoka lir," ta sangdong nung shia lir.

"Sorkari item ama ketdangsertem nem sempet magutsütsü NPRAAF-i akhanger, kechiyong ibaji ajanga state tajungtiba agi kanga nendaka tenzükerem teimla samatsü," ta sangdong nung shia lir.


State sorkari tashi mangai tenüngji benoka inyakra NPRAAF-i ochi temeden atema maneni iba ken o asoshi inyaksü, ta parnokisa metetdaksügo.

Tanü nungi Karbi Anglong mokdang

Diphu, January 21 (Agencies): BLT-i sign asüba 2003 küm Accord benshia Karbi Anglong district nung alir Bodo nung ST(H), ta züngshitsü atema telemetba agiba anema KSA,

KYTO, KUA, KFA, UFC aser AKSU-i longjemer January 24, 2018 anepdang 5:00 ako nungi tenzüka mapang telatet ka makai Karbi Anglong mokdangtsü, ta osang ka ajanga metetdaksü.

Priyanka-i yimtenren nung ajemokogo



Priyanka Gandhi (File photo)

New Delhi, January 23 (Agencies): Congress Party Tir, Rahul Gandhi teno, Priyanka Gandhi-i yimtenren nung ajemoktsüa akok, ta küm aika jembia aruba sülen tanü lai yimtenren nung ajemokogo.

Tanü Congress Tir, Rahul Gandhi-i teno Priyanka Gandhi Vadra, Uttar Pradesh All India Congress Committee (AICC) General Secretary shimogo.

Congress-i sangdong ka ajanga, Priyanka-i February ita mezüngbuba hopta nungi General Secretary mapa agizüka inyaksü,

ta metetdaksü. Priyanka yimtenren nung ajemokba osang sangdongba sülen Congress lenir, Motilal Vohra-i, "Priyanka nem agutsüba mendenji kanga tongtibang. Iba ya ajanga anüdoklen Uttar Pradesh dang masü saka tesem aika kongshitsü," ta metetdaksü.

Taoba mapang elections nunga Priyanka-i Uttar Pradesh nung Congress party asalentongtem aser nüboyim sentongtem nung yaritepa aruogo. Lai mapang shia tetsü, Sonia Gandhi'er constituency- Rae Bareli semdanga Lok Sabha aser Assembly elections ajak nung nüboyimja aru.

Iba dak alia Congress Party-isa K C Venugopal, AICC General Secretary shim, ajisüaka Karnataka nunga pa maneni AICC General Secretary in-charge asutsü.

Tawa Madhya Pradesh assembly elections nung BJP tamakok ngudaksüba nung shilem tulu agisang, Jyotiraditya Scindia, Uttar Pradesh West nung AICC General Secretary shimogo.

Sudarshan News Channel-i Ruzazho yim 'adopt' süogo

Ruzazho (Phek), January 23 (TYO): Netaji Subhash Chandra Bose sor küm 122 ajungba nungtem nung Delhi nung amenoka aliba Sudarshan News Channel Ltd.-i tanü Phek District kübok Ruzazho village 'adopt' süogo; iba yim ya mezüngbuba Azad Hind Government administered village (1944) ta züngshir.

Tanü Corporate Social Responsibility (CSS) kübok iba yim shimba sangdong agutsüba sentong nung jembidang Sudarshan News Channel CMD aser Editor-in-chief, Suresh Chavhanke-i, iba yim shimba ajanga Sudarshan Rashtra Nirman Trust-i tezülen aliba yim (Ruzazho) ya lenla ajak nung renloksütsü atema inyaksü, ta metetdaksü.

Paisa, iba Trust-i Central sorkar den jembia senotsü meshizükter gari lenmang yanglutsütsü aser Heritage Village ka kümdaksütsü;

iba dak alia Ruzazho nung Bose anenzükba ki ya national museum kümdaksütsü aser Eklavya School-a ka amenoktsütsü, ta metetdaksü.

Trust-i iba yimtsüng nem facilities balala agutsüba den social media aser information technology ajanga India lima tesem ajunga den sendakteptsütsü, ta paisa metetdaksü.

"Bose iba yimdak mongzükba mapang nung pa den yariteper ajak nem pension agutsütsü atema Trust-i inyaksü," ta pai ashi.

Chavhanke-i, pa indang channel ajanga iba yimdak aliba tejangrar lanurtem atema yimti tulutem nung mapa agutsütsü asoshi inyakba den külemi journalism nung ajemoktsü asoshi ajak nem angati training agutsütsü, ta metetdaksü.

Iba yim ya Digital Ruzazho kümdaksütsü, ta shia pai, iba yim ya wi-fi angati anguba yim

kümdaksütsü aser connectivity atema tayimtsü (helicopter) anentsü asoshi helipad ka yanglutsütsü, ta ashi.

"Ni nungitang aser ni Ruzhazo yim renloksütsü. Iba nükjidong matalok tashi onoki mapang shia iba yim semdangtsü," ta pai sangdong.

Kasa sentong nung NEPED Chairman, Kevechutso Doulo aser Sudarshan Coordinator T Sanyal natia jembia liasü.

Sentong nunga Nagaland Higher & technical education Minister, Temjen Imna Along onük Doulo-i zünga metetdakja liasü.

Iba sentong ya Dr. Er. Vekho Swuro leniba nung agi; Ruzazho village council chairman Jolelu Veswuh-i lokti pelaa agizükba o jembia aser management committee convenor Zaposeyo Shijoh-i tepela anküp o jembia liasü.

Ao Arangtet Tatidang nisung 151-i agütsüogo



ASLB-i ayongba Ao Arangtet Tatidang centre ka nung agiba mapang tangokba noksa nung angur. Mokokchung, January 23, 2019

Mokokchung, JAN 23 (TYO): January 21 nungi tenzüka anogo asemnü tashi Ao Senden Literature Board (ASLB)-i achayanga agiba Ao Arangtet Tatidang Centre asem - Mokokchung, Kohima aser Dimapur nung takok ngua agiogo.

Taküm P.U level nungi tenzüka Graduate aser PGD course balala atema centre asem

nungji nisung ajak agi 151-i tatidang agütsüogo. Mokokchung centre nung parnok 118, Kohima centre nung 11 aser Dimapur centre nung parnok 22 liasü. Tatidang agütsür rongnung tetsür teimba liasü. Mokokchung nung Jubilee Memorial School, Kohima nung Chandmari HSS aser Dimapur pur Mission HSS nung agi.

Arangtet Tatidang ya tongtibangsa Ao oshi zülumen lirumedemba den külemi oshi wazüka aser tejakleni awa oa bener aotsü nükjidong nung joko taküm agi küm ter (10) dak tali ASLB-i achayanga mapang shia ayongzükba akar. Iba tatidang ajanga course balala nung certificate aser diploma agüja arudar.

DIMAPUR AO BAPTIST AROGO
HEALING SERVICE SENTONG JANUARY 30, 2019
 DABA Main Church, Duncan nung January 30, 2019 anepdang 7:00 ako nungi tenzüka taneptsü sentong tuluka akatsü, anungji shirnok Tsüngrem nungi taneptsü aginer tamang agi sarasadema arung. Tsüngremer sayatenya tulu nung ali mozü agi manepetba tashidak aneper aotsü. Tsüngrem oi ashir "Tetsüba, tamang dang amangang"- Mark 5:36.
 Iba sentong takok angutsü atema amangbapurtem ajaki sarasademtsü mepishir.
Sd/- Pastor, DABA

NBSE-i Cyber Safety nung seminar ka ayongtsü

Kohima, Aenjeti/Jan. 23 Iba seminar nung Cyber Safety atema aser Science Syllabus & Academic Board of School Education) aser Mathematics tekarak angazüksü atema Educational Application Software amshiba yimyatem Cyber Expert Rakshit Tandon-i sayutsü. Seminar agiba sülen HSLC & HSSLC Admit Cards: To the Centre

Superintendents, Secondary Syllabus & Academic Calendars 2019 tem Kaket reju nung tekolak ajak nem agütsüsü.

Anungji iba seminar nung kaket reju nung tekolak ajak aruagi adentsü atema mepishir, ta kasa sangdong nung shia lir.



24TH ANGETYONGPANG INDEPENDENT PARTY-I TENÜNGSANG AGÜTSÜR

January 20, 2019 nü MIT-World Peace University Campus, Pune nung 9buba Convention (9th Bharatiya Chhatra Sansad) sentong nung Nagaland PWD Minister, Tongpang Ozükum-i Aadarsh Yuva Vidhayak Puraskar (Ideal Youth Legislator Award) anguba atema 24th Angetyongpang Independent party-i lenir nem tetushi tulu agutsür.

Tarutsü nükla tajung aketba asen lenir dak India limai-a mapa tajung repringteta pa nem tetushi agutsüba atema Tsüngrem tenüng asanger. Tsüngremi lenir nem takok maneni moajang ta sarasademtsür.

Sd/-
Nungshimangyang
President,

Sd/-
Repachuba
General Secretary

24th Angetyongpang Independent Party

GOVERNMENT OF NAGALAND
DEPARTMENT OF YOUTH RESOURCES & SPORTS

XXth Inter District FOOTBALL CHAMPIONSHIP 2019 Dr. T. AO TROPHY

Opening Programme

Date : 28th Jan. 2019 | Time : 12: 00 Noon

Introductory note	: Er. Zale Neikha Advisor Youth Resources & Sports
Invocation Prayer	: Rev. Kuzierang Thou Nagaland State Chaplain
Technical report	: Er. Nimo Kath Executive Engineer YRS
Word of Appreciation	: Shri Atuo Mezhür Sekhose President, NFA
Special No.	: Smti. Ajeen Longchari Sucha (Grand niece of Dr. T.Ao)
Speech from Special Guest	: Shri Neiphu Rio Hon'ble Chief Minister Nagaland

KICK OFF
Exhibition Match
CM XI Vs CS XI

GOVERNMENT OF NAGALAND
DIRECTORATE OF SCHOOL EDUCATION
KOHIMA : NAGALAND

NOTIFICATION

Kohima, the, 23rd Jan. 2019

NO.:ED/DIR 1 - MIS/2018 :: It is hereby notified for the information of all concerned that the Hon'ble Prime Minister of India will be interacting with a cross section of students, teachers and parents in the programme 'Pariksha Pe Charcha 2.0' at Talkatora Stadium, New Delhi on 29th January 2019 from 11:00 am to 1:00 pm.

The event will be broadcasted live by Doordarshan through DD National, DD News and DD India. It will also be available through live airing on radio channels(All India Radio Medium Wave, All India Radio FM Channel), Live web streaming on websites of PMO, MHRD, Doordarshan, MyGov.in and Youtube channel of MHRD, Facebook Live and Swayamprabha channels of MHRD.

Therefore, the Head of Institutions of all Middle, High and Higher Secondary Schools(Both Govt. & Private Schools including CBSE Schools) functioning in the State of Nagaland are hereby directed to make necessary arrangements in their schools so that all students from class 6 (six) upwards may view/hear the telecast.

Apart from TV broadcast, the viewing facility may also be arranged through Edusat, internet access devises and through radio/transistors.

Compliance report of this notification should be submitted along with photographs through email at: director.se.nagaland@gmail.com before 15/02/2019.

Sd/-
(WONTHUNGO TSOPOE)
Director.

Issued by DIPR

Jan. 25 nü National Voters Day tenangzükba agitsü

Kohima, January 23 (TYO): Electoral roll nung arishi küm 18 ser temapur, voters tasepur register asütsü aser election inyakyim ajungkettsütsü atema Nagaland State-i January 25 nü National Voters' Day amungtsü, ta tanü ketdangsertem osang ka ajanga metetdaksü.

Election Commission of India-i state nung department balala nungi ketdangsertem aser staff tem dang January 25 nü National Voters Day anogomung

nung anüngdang 11:00 ako nung peipei office nung sentong tatsüka ayongzükba National Voters Day tenangzükba agitsü tetuyuba agutsüogo, ta kasa osang nung shia alir.

Iba dak sendakba nung Nagaland Chief Secretary-i, iba anogomung amungba osang den noksatem Election Commission ket nung agütsütsü atema Chief Electoral Officer, Nagaland office nung agujang, ta metetdaksüogo.

Kangtsüng Senso Telongjem Tuli-i sashia aitsür

Tuli, January 23 (TYO): Wameken lushi nung taoba mapang nisung kari tzümar Halwating town, Assam nung alir driver ka tepseta yutsür gari auya-a bener aoba January 16, 2019 anogo nung gariji angü; iba ama mapa tamajung inyaker nisungtemji Kangtsüng Senso Telongjem

Tuli (KSTT) ajanga kanga sashi-sashia aitsür aser item mapa tamajung inyakerji ozüing amertemi tekeratiba nung pua tapet temerenshi agütsüsüla, ta KSTT Tir, Wb. N. Amen Imsong aser KSTT tongti tezülur, Wb. P. Imli, nati sangdong ka ajanga metetdaksüogo.

Dimapur police-i ozüing nung aibelenertem apu

Dimapur, Aenjeti/Jan. 23 (TYO): Addl. Dy. Commissioner of Police/PRO Dimapur, Nagaland-i sangdong NO.CP/DMR/ESSTT-63/2019-20/ ajanga ashiba agi, 16/01/19 anogo Dimapur Police-i Khatkhati Opp CRPF Camp Assam nung alir Montu Borah'er jabaso Ravi Borah Burma Camp, Dimapur nung apu aser pa ket nungi Spasmo Proxyvon capsule tejang 2800 ngutet. Iba ken o ya East Police Station Dimapur nung zülüoker bushisüingdang südagi.

Dimapur Police-isa 17.01.2019 nü Burma Camp Dimapur nungi arishi küm 37 tain Hekuto apu. Pa ya iba tesem nung mobile hand set ka den sen 5000 rakzüksü merangba mapang pua liasü. Iba ken o ya East Police Station Dimapur nung zülüoka bushisüingdangba mapang lir, ta kasa sangdong ajanga ashi.

Maneni 19.01.2019 nü Dimapur Police-i nisung ka Town Hall Dimapur anasa Super market nung tashiyim agi mobile phone aser sen 3000 rakzükba mechi apu. Pua alisang ya Super Market, Dimapur nung alir Akaho Ayemi ta jangjaogo, aser iba maparen dak sendakba ken o ya East Police Station Dimapur nung

zülüoka bushisüingdang südagi. 19.01.19 anogosa Dimapur Police-i nisung ka Central Jail Junction nung jakdaka gari auyaa lia apu. Iba nisungba ya Alaphu, Zunheboto nungi Hevikhe'er jabaso arishi küm 35 tain aser tang 4th Mile Agri Expo nung telidak Tokugha Choppy ta jangjaogo. Pa apuba sülen police temi Government registered Mahindra Bolero ka Zunheboto district nungi ngutet, koba kasa 4th Mile tesem nungi 12.01.19 nung auyaba liasü. Iba maparen nung ken o ka Diphupar Police Station nung zülüoka bushisüingdang südagi.

Maneni osang kar nung ajemdaker Dimapur Police-i 21/01/19 anogo Old Railway Gate, Below Fly Over Bridge Dimapur nung aliba Hotel ka nungi nisung asem, Khon Khiamnungan (32), Sukhiam Khiamungan (22) aser Mono Khiamnungan (22) apu aser parnok ket nungi .22 pistol ka den magazine ka aser injang pongu, .32 pistol ka den magazine ka aser injang ana ngutet. Iba dak sendakba ken o ka East Police Station nung benoka bushisüingdang südagi, ta Addl. Dy. Commissioner of Police/PRO Dimapur ajangasa metetdaksü.

Rohingya nunger 31 Tripura police nem agütsü Himanta anema ken o benok



Mongolbarnü Agartala nung police station kima Rohingya tsür ka lar chir ajunger jeba nokdaka aliba noksa nung angur.

Agartala/New Delhi, Aenjeti/ January 23 (Agencies): Mongolbarnü BSF puri Rohingya Muslim nunger parnok 31 Tripura Police nem agütsüogo. Parnok ya India-Bangladesh arrtsü nung taolen makai anogo 4 tashi aliba sülen tang police nem agütsüogo. Kasa mapang nung Assam nunga kasa kin nungi nisung 30 apuba ketdangsertemi metetdaksüogo.

Rohingya nungertem ya Jammu and Kashmir nungi aru asütsü ta amanger aser parnok ya Indo-Bangladesh arrtsü len atsü adena orr nisung shinga maliba li nung January 18 nung taolen makai liasü.

Parnok ajanga Border Security Force (BSF) aser Border Guards Bangladesh (BGB) na tsünga mangatettep adoka liasü. Telok anapronglai parnok litsüi Rohingya nungertem ya yok ta kati ka dak tongloksütep.

BSF aser BGB na iba ken o dak sendakba nung olemtetba tatembangka dangi marutetba sülen Rohingya nungetem ya

Tripura Police nem agütsütsü telemtetba agi.

Rohingya nunger parnok 31 ya medical check-up agir külen West Tripura district okadaki anir ao, kong parnok anogo 14 judicial custody nung ayutsü tetuyuba agütsü, ta ketdangseri ashi.

BSF, Deputy Inspector General Brijesh Kumar-i ashiba agi, "onoki iba ken o BGB den jembiogo aser Rohingya nungertem ya Bangladesh-i aitdaksütsü mepeshi, saka parnoki magizük. BGB ten sensaksem aiben kaogo saka tamakok nguogo. Ajasünung onoki parnok police nem agütsü." Battalion commander-level senden ka Zero Line nung Deobarnü mena liasü, ta ketdangseri ashi.

New Delhi nung ketdangsertemi ashiba agi, BSF-i iba sensaksem indang osang Home Ministry nem agütsüogo.

Ministry nungi temelaba agütsüba sülen BSF puri Rohingya nunger parnok 31 West Tripura district police

kübok Amtoli police station nung agütsüogo aser iba ajanga Bangladesh den mangatettep aliba tembangogo.

Ketdangserisa ashiba agi, state police-i Rohingya nungertem osang tejangja agitsü aser BSF pur dang iba mapa atema teyari agütsütsü shiogo.

Parnok ya Jammu and Kashmir nungi aru asütsü ta temulung melemer bilemer, ta ketdangseri ashiba den ken o bushitsüngdangba sülenang ochiji jangjatsü, ta ashi.

Amtali police station, officer-in-charge Pranab Sengupta-i PTI dang ashiba agi, tetsür 9 aser tanur 16 densema Rohingya nunger 31 temang asadangtsü atema Tripura Medical College-i yokogo aser parnok ajak temang anema lir.

Paisa, BSF puri parnok nem chiyongtsü, tzü aser tanga tenüngdakba osettem agütsü, ta ashi.

BGB puri parnok ya India nungi ait ta ashir aser kasa mapang nung BSF puri India tsütsü atsü rakpoker aoba kecha temaitsü mali ta ashir.

Guwahati, January 23 (Agencies): Assam finance minister Himanta Biswa Sarma-i kin dak ajemdaker tashishitsü o jembiba anema Rangiya police station nung Mongolbarnü ken o ka benokogo.

Rangiya nung alir Kanihar Hareswar Barman-i minister Sarma anema ken o benoka liasü.

Minister-i o jembiba mapang kin tsünga tsükchiteptsü osang prokshiba atema aitsü.

Hombarnü minister Sarma-i Rangiya kübok Kalamoni sendangba mapang Krishak Mukti Sangram Samiti (KMSS) aser Asom Jatiyabadi Yuba Chatra Parishad (AJYCP) züngsemtemi wako tanak sayuba dak sendakba nung osangbenertem den sensaksemba mapang Sarma-

i jembiba o dak ajemdaker ken o ya benoka liasü.

Ken o benoksang Barman-i osangbenertem den sensaksemba mapang ashiba agi, Himanta Biswa Sarma amala mapa tulu ka bener aliba nisung ka dang nungi iba amal o jembitsü imlaa maliasü.

Kasa mapang nung Rangiya police station office in charge-i iba ken o agizükba jangjatsüogo. Ajisüaka iba osang agütsüba mapang tashi nung pai ashiba agi, ken o kecha file süa mali.

Temetetsükaji taoba mapang nunga minister Sarma anema mapang balala nung ken o benoka aruogo.

Ajisüka mapang timba ka nung Assam Police-i minister anema ken o benoktsü atidaka bilemba aser momulungba sayuogo.



January 23 nü Guwahati nung AASU aser kin 30 lokti tenteti-i Braja Ninad ayongzüka akaba mapang tangokba noksa nung angur. Kin 30 aser All Assam Students' Union (AASU)-i ayongzüka longkak aitba sentong ajanga tang Citizenship (Amendment) Bill 2016 anema longkak aitba sentong tali akangshidaksüogo.

Assam-i party ajak tebilemdangba angadangtsüla: Mukul

Shillong, Aenjeti/January 23 (Agencies): Meghalaya State Assembly opposition lenir Dr Mukul Sangma-i Mongolbarnü,, Meghalaya den mapang talangka arrtsü dak sendakba nung ken o bangdaka aliba bentettsü atema Assam-i political party ajak tebilemba angadangtsüla ta shiogo.

Congress lenir tejen aser taoba Meghalaya chief minister Dr Mukul Sangma-i ashiba agi, Meghalaya-i arrtsü dak sendakba nung political party ajak tebilemba angadanga küm ishika tejakdang resolution ka agizükogo.

"Assam-ia iba amaji inyaksüla mesera temerang danga merandangtsüla," ta state ana terenlok atema kidanger state ana külemi longjemmer inyaksüba indang jembidang Sangma-i ashi.

Iba ken o ya Congress pur election manifesto dak sendakba nung senden amenba mapang jembia liasü.

2011 küm Dr Mukul Sangma CM asüba mapang Meghalaya

sorkari Assam nem mangatettep aliba tesem 12 parnok meyong kümdaksütsü khanga tezüluba nung takhangba ka agütsü aser iba den iba tebilemtsü ya angatetteptsü shia liasü.

Taoba küm November ita Assam, West Karbi Anglong district aser Meghalaya kübok West Jaiñtia Hills aser Ri-Bhoi district tem nungi MLA aser ketdangsertem senden ka menogo aser iba senden nung parnoki kidanger tsünga mangatettep adokba nungi jenbotsü atema Meghalaya-Assam arrtsü len terenlok maparen balala inyakba mapang nung osang agütsütetptsü mulungtepa liasü.

Iba senden ya Ri-Bhoi district headquarter Nongpoh nung mena liasü.

Iba senden nung terenlok maparen balala benoka inyaksüba ken o aika benoka jembiogo aser Assam police-i arrtsü nung Meghalaya-i yangluba kiojen tem raksatsüba indang dena jembia liasü.

Mizoram nung Citizenship Bill anema longkak ait



Aizawl: Kaketshirtem densema nisung meyirejang aika Bodhbarnü Citizenship (Amendment) Bill anema yimtung nung longkak aitba noksa nung angur.

Aizawl, Aenjeti/January 23 (Agencies): Bodhbarnü Mizoram kübok tesem balala nung kaketshirtem densema nisung meyirejang aikati Citizenship (Amendment) Bill anema longkak aitogo.

Longkak aitertermi Ato Kilonser Narendra Modi aser Union Home Minister Rajnath Singh indang noksa rongja longkak ait. Mizoram kübok district headquarter tenet aser tanga tesem 50 dak tema nung

Mongolbarnü longkak aitogo.

Longkak aitertermi placards bener yimyim ayima senzü aser PM Modi aser Home Minister Rajnath Singh mapa nungi anentsü asoshi khanga liasü. Parnoki ashiba agi, iba mepetmesü aket bill ajanga Mizo nunger tali majungtsü ta shia liasü.

Iba rally ya Mizo Zirlai Pawl (MZP)/Mizo students federation-i ayongzüik. Parnoki January 8 nüa state ajunga ghonda 11 mokdanga liasü. MZP tiri ashiba agi, iba bill ya agizükra iba ajanga Mizo nunger samatsütsü.

Citizenship (Amendment) Bill koba January 8 nü Lok Sabha nung agizükra liasü, iba ajanga Bangladesh, Pakistan aser Afghanistan nungi Hindu, Jain, Khristan, Sikh, Buddhist aser Parsi nunger nem parnok ket nung kuli kaket kecha meliaka parnok nem India nung küm trok aliba sülenbo lisopur jenjang agütsütsü meranger.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI 24, 2019

Vote agütsürtem anogo

Asüng January 25 anogo ya linük ajungalen vote agütsürtem anogo amongtsü asoshi Election Commission of India-i state government ajak dang nenshia metetdaksüogo. Iba anogomong takok ngua amongtsü asoshi state government kübok department shia nung linük nung vote agütsürtem anogomong sentong yanglua tenangzükba agitsü asoshi tetuyuba agüja lir. Atangji, iba anogomong monga tenangzükba agitsübaji government mapa nung alirtem dang masü saka linük nung tasoba küm 18 ajungertem nungi tenzuka shirnoksa pei lima aser yimten nung yimsüsür shimtsü asoshi temeten ngua ali, parnok ajak asoshi tenangzükba agitsübaji kanga tongtibang asütsü. Tanü putu nung yimsüsürtem shimtsü asoshi nübertem nem tashi aser temeten agütsüba maongka ya kanga tulu lir. Iba tashi aser temeten yagi yimsüsürtem dangbo nübertemang tashi tuluba akümer. Akhidangbo, yimsüsür shimtsübaji kibong ka senmang ama yimsüsüba menden amangtepa aru, anungji nübertem dak kecha tashi mali asü. Ajisüaka, tanü democracy lima nungbo nübertemiang yimsüsür shimer asünungji, yimsüsüba menden ya kibong mesüra kin kidong ka senmang masü saka nübertemi mulungba shimtsü asoshi nübertem dak tashi aser temeten alinungji, senbso shiai iba temeten ya pei lima yanglutsü asoshi nungloksüba khuret ka ama agitsü nungdaker. Nübertemi dang yimsüsürtem shimer asünungji yimsüsüba jungra nübertem nungsang aser mejungra nübertem nungsen ta kümogo. Ibaji kodang asenoki angateta election nung shilem agidir, asenok nisung shiai kanga zungzunga aser süoki ia agitsü. Asenoki shimba nisungi asenok agitsüba tzu, mopong, lenmang, kaketreju, mozü ki aser alu indang telemtetba agitsü. Anungji, kodang vote agütsürtemi nisung ka nem vote agütsüdir, iba nisung nemji asenok aser asen chirnurtem atema tang aser tarutsü asoshi telemtetba agitsü tashi agütsür ta angateta election nung shilem agitsüla. Ashiko, aiben asenoki item ama tongtibang taküm nungdaktem indangji mebilemdangi kinunger mesüra yimtsüryimer apia mesüra senotsü tera aginüba agi election nung zübazübaa shilem agia alitsüa akok. Ibayongji, asenoki aiben asenok atema tang aser tarutsü nungdak shisadanga jembitsü makokba nisungang ka shimtetsüa atatsüa akok. Iba amaji kodang asenoki yimsüsür shimba tashi aser nükjidong mangateti election nung shilem agidir, ashiko, pei lima aser nübertem meima inyaksüba nisung masü saka pei asoshi rongsen bushitsü atema yimten tashi bushirang ka shimtetsüa akok. Itemji vote agütsütsü temeten alir shia asoshi tekümdangtsü mapatem lir. Joko, ita anasemka tsüngda ano election tuluka ajurutsü. Iba election nunga asenoki tangatetba tajung nung shilem agitsü asoshi asenok mulungjang shia nung tenangzükba agitsübaji asüng ama Vote agütsürtem anogo ya shitak anogo ka asütsü. Ano, tebilemstü kaji asenok rongnung aikati election anogo nung vote agütsüi maor, iba jagi nisung shitak ka shimtsüba melena tangar nem meshitakba nisungang ka shimtsü lenmang lapoktsür. Asenbo election nung vote agütsüia mao saka election temerbo vote agütsürtemi akümba government kübok timatemer ta alitsübaji senso ka asoshi tamashi mapa asütsü. Asenoki election anogo ya yimsüsürtem shimba anogo dang masü saka asen lima yanglushitsü atema telemtetba agiba anogo ta angateta shilem agitsüla. Iba tangatetba nung tang nungibo pei vote peisasa enoktsüsa tanitebelem arema vote agütsüi aotsü nangzükdi. Vote ya dokan nung shishilembaba oset masü, anungji election nung vote malitsü aser mayoktsü nangzükdi. Yimten yimsüsürtem shimba mapa ya temeshi aser ochishia inyaksüba mapa ka lir, anungji election mapang Tsüngrem dang asüngdanga sarasadema shilem agitsü nangzükdi.

OLEMSABANG

YIMTEN ASER AROGO PANGDAK

- Talitemjen Imchen

Kechi telok südir süaka, kong temzüng aika lidir, iba telok ji tejaklen-i aoba telok ka masür. Mesüra tejaklen-i aoba telok ta ajatsü makok. Temzüng tali tali mapang shia yanglulukba ji telok jangyu memedemba tera lir. Temzüng mesüra guideline aika aliba ji, aiben süngdong ka süngzü agi naipanga rajang kümdaktsüba mesüka akümer.

Yimya agi nisung kati tongtipang telok ana nung alir. Yimten aser Arogo. Arogo tentet dang ya tanülar tentet ta ajatsü akok. Sobaliba telok tentet mesüra mulungtet telok tentet balala ajak Yimten tentet den sendaktepa kar. Aser ajak ji nisung ka asoshi taküm azüoka, jenjang meteta alitsüyim lir. Yimya agi Yimden nung temzüngtem ayur aser Arogo nung guideline (temzüng) ayur. Itemji nisung kati dang telok tentet balala nung anidaker aser anir asünung, aiben Yimten aser Arogo inyakyim meyoktepa kümdaktsür. Saka Yimten aser Arogo ranglok aser inyakyimji khenyongi balala kar.

Aiben asenoki temzüng aser guideline yangludang teti agitsü aser ajungtsü ama bilema yanglur ayur. Saka lialia mapet akümer. Kechiaser alima ji ainer aser putu yimyaji melenshir atar. Sobaliba aruba tsütsüji tongmelang agi shisadanga, tesüiba inyakyim mesüra ken o bendangyimji aika tai ama aseni bilemer. Saka parnok putu mapang tensa den tapet ken o bendangbatem asütsü aser lir.

Yimten süaka, koba telok tentet südir süaka, kodang temzüng aika yangludir, tangar telok memenepi akümer. Telok lirumedema anir aotsü asoshi ketdangpurtem shimteter aser parnok yariteptsü asoshi sanen luden ayur. Parnok nem nübur lennitsü tashi peria agütsütsü tim aser telok ji akangalonga bener odaktsütsüla. Lennirtem-ia ken o ajuruba shia temzüng aser guideline tasen yangluluknuba yimya ya anentsüla. Temzüng aser guideline renlokba jagi telok ka dang tali rajang akümer. Ano tesusatsü ka ji, alima tejaklen-i aoba indang jembir, saka ken o bendangtsü asoshi, tensa nung apet bendangtsü merangteper masü, tesüiba mapang koma bendanga aru kasa ji bendangtsü merangteper. Joko iba ama ken o bendangba yimya ya ajema kümdaktsütsü tenungdaktsü. Kechiaser asenok küm nung dang tain akümer masü, shisatsü, libaliru aser asen jakdang tagitarutsü ajak tajungbalen-i sayatenyatsüka melenshia ainer.

Arogo tsütsüji kodang reprangdangdir, yimten temzüng kwi amshir, ajakji Arogo guideline (temzüng) nunga inoker amshiner. Nisunger azüoka wainshia alitsü temzüng dang asünung, telok nung temzüng ajakji tapet ama dang mesüka angur. Saka Arogo nung temzüng ji Laishiba dang asütsüla. Guideline yunürapang yimden temzüng ama masü saka kanga ajema ayutsüla. Aser aji Sannüker-i anir Arogo Luden (Deacons) ajanga Tsüngrem-i mulungba ama amshitsüla. Arogo nung kodang yimten ama guideline tali yangludir, iba Arogo ji tobur junga motettsü aser temenünütsü tentet ka dang akümer. Arogo aika nung guideline tem pei-i inoka ayu memetet, pur tajungi inoka ayu memetet ta guideline agi sünger, tanülar Arogo ama motet chitaka kümogo.

Yimten ken o nung telok timbai mulungba agir. Saka Arogo ken o ajakbo tempanga mejembir. Arogo nung ken o karbo Tsüngrem dang sarasadema bendangtsüsa kar. Yimten nung tanüla-i jembiba sabua mejembir. Saka Arogo nung tanüla tejembiba balala kar. Tsüngremer mapang tatong nung jembiba sayatenya balala kar. Ibajiang Arogo asoshibo apongmen (preamble). Saka kodang Arogo nung guideline aika lidir, iba jagi tanüla tejembiba aser Tsüngremer sayatenya chimidaktsür. Yimten nung aibelener ajak Yimten Salang nung ken o tempanger. Arogo nung aibelener timba Tsüngrem-i meremshir. Kechiaser Arogo temzüng ji Pa o (Laishiba) nung amenoker lir. Ano aiben telok-i taidok magütsütetba aibeleneritemji, Tsüngrem-ibo taidok agütsür.

Anungji, Arogo aser Yimten pangdak ana ranglok aser inyakyim ji benteta amshitsü nungdaker. Temzüng aser guideline ajema telok nung ayuba ajanga Ao kin lokti tentet balala tali tashi taitba nung lirumedema otettsü tamang akar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tsüngrem o temeja sayutsüngitsü mapang tongogo

~ L.Kika Pongener.

(Taoba adok nungi...)

Ajisüaka, ano Tsüngrem o tali aroka bushir ta asüdüng Laishiba tesayuba nungi pila-a maotsü kanga kümdangtsüla. Alima nung tamang yimsü zünger mezüngma kümadokogo, kobala-ang shidakba aser koba-bo meshidak ta bendangtsü mokoki kümadokogo. Anungji joko asenok tenla kidang Missionary, Pastor aser sayutsüngir-temi Tsüngrem o sayutsüngiba angaba dang masü, saka pei sasa Laishiba azüngtsü aser bushitsüba mapang tongogo. Asenoki asen sasa Tsüngrem o tejangja angateta melira, asenok tesayuba tapu balala agi mashileni anitsü ana nung lir. Paul-i Efesa nung dangi züluba ama, "Nenoki mojing külakoktsüba anema nokdaktetsü asoshi, Tsüngrem-er raraba sübotsü ajak süboang. Aser tesunep osangtajung terenemba tsüngsem tetsüng nung semer nokdakang. Aser idakji chia ano tamangjong koba agi nenoki tamajungba meyong mi aketba lijakjang sepdaktsütetsü aji süboang. Aser tekümtet merang korang, aser tanela nok, koba Tsüngrem o lir itemji agiang" (Efesa-6:11-17). "Asenok joko tanur ama malitsü, mesüra tesayuba mopung shia agi meinzütsü, nisung tekülak aser sangrasangji agi, mesüra aibelena tiyazü sayuba agi ona oli aruli ta masütsü" (Efesa-4:14). Tanü putu nung alima tashitemet renlokang, 'Scientific aser Technology' tapu-tapu adoker, alima nung Tsüngrem mali-a ta ashitsüsa tesüngmangtsü mapatem aika ataloka aodang, memeteti Laishiba tesayuba nungi pila-a aotsüsa sang jenti lir. Aser tiyazü tesayur aika tamangertem mashileni anir aotsüsa tesayuba tapu-tapu sayua arutsü. Anungji item tiyazü tesayuba-tem anema raratsü asoshi hadir tajungtibaji Tsüngrem o Laishiba anogo shia azüngtsüla. "Nisung kari tesayuba balaka agi sayura, aser asen Kibuba Yisu Khrista o nung, aser temeshiba amato sayuba o nung haura makara, pa angka ogo" (1Timoti-6:3). Atangji, tanü putu nung tesayur tapu tapu adoker tamangertem mashileni anir aotsüsa, tesayuba balala agi jembia arutsü.

Tsüngrem lar aser sayutsüngir tenüng atemer meshimetsüa jajar-a jenti adoktsü. "Kechiyong parnoki Tsüngrem tsübubaji tajangzük angulen ta bilemer" (1Timoti-6:5). Yisu-i shiogo, "Shinga-ia nenok mashileni manidaktsütsü kümdangang, kechiaser kü tenüng nung aikati, 'Ni Khrista' ta jembia arutsü aser aika mashileni anitsü" (Mathi-24:4-5). Anungji Tsüngrem-er ochi miim o aser Yisu Khrista kangki nung angenlokba aser pai asenok temenen nungi alangzüktsü asoshi pa taküm rangben tenla agütsüba, iba osangtajung dak alaka, tanga alima tazü-tapongtsü, purapoji, sangrasangji o-tem aser temesüzükba o-tem mejembitsü, Tsüngrem o jagi asenok dang tejangja ashir. "Ni nisung aser kotak tenyar oshi nung jembia, saka kü dak temeim melira, ni taküba ola mesüra taküshiba yin aküm" (1Korint-13:1). Atangji, nisunger oshi agi masü, saka 'Kotak Tenyar' oshi agia dena sayutsüngitsü-sa sempet liaka, saka Tsüngrem temeim aser pa nungi anguba miim o shisatsü temetetba makara, sayutsüngiba ajakji purapoji o, yin taküshiba ola dang asütsü. Anungji jokorla, tangbo Tsüngrem-er miim o Laishiba o tarok bushitsü, aser teret temerang mejaktsü aser sayutsüngitsü mapang tongja tongogo.

ANO GO ABEN TSÜNGREM DEN

YANGLUR MESÜRA RAKSAR

Nenok tebang nungi o tamajung ka danga tadokdaktsü. Saka tenüngdaktsü ama to kechi yangluluktsü asoshi tajung lir, tangashirtem nem taochi agütsütsü aji jembiang. Efesa 4:29

Pauli Efesa nung dang parnok Khrista nung kechi jenjang lir ibaji ashi aser parnok ajaba koda temsüa jajatsü iba indang ashi. Pai temeim nung ochi jembitsü aser taküm tasen sobutsü ashi. Na ain adokra, tai temena ta pai parnok dang ashi. Ain adokra yakta süngzüktsü ashi kechiaser ain adokbai tesendaktep raksar. Pai ya tejangja ashi tangar mezüngmeshia mesüra tangar yirudakja tiyazü o ain adoka mejembitsü ashi. "Ne tebang nungi o tamajung ka danga tatokdaktsü."

Kari ashir, "Ajok aser lung agi kü terüt raksatsütsü akok, saka O agi ni kodanga meyurutsütsü." Aji kanga shidak masü! O agi takok tashi atsünger aser kanga mejungi yirutsür. Asenoki tangar ajungshitsü angatetdaktsütsü O jembitsüla. "Yangluang mesüra shibangang." Yakobi ashir "temeliji mi lir" (Yakob 3:6), aser tasütsü miim agi sünga lir (3:8). Ne bang nungi ken o chiokbaji tanaben bena arutsü makok. Teraksa adoker. Khristan ka ama asenoki o tajung jembitsüla, kanga kümdanga jembitsüla. O tamajung jagi asenok kulisüba mapa nung timtem adokdaktsür. Khristan taginüba liba-liroji tekong ka tongmelang agi ashitsü akok. "Angashitsü karaang, jembitsü aser ain adoktsü meilungi süang" (Yakob 1:19).

Oba, tanü ni kü temeli nüka alitsü yariang. Tangar raksatsütsü masü ,yaritsü kü O tem tajungshiba otem südakjang. Amen.

Pop Francis-i 'Pray App' ka saya



Vatican City, Aenjeti/Jan. 23

(Agencies): Pope Francis-i tamangertem pa den külemi sarasademtettsüsa app tasen ka Amungnü saya aser Colombia nung gari bomb apokba lendong aser Mediterranean migrant temi timtem balala ajangshiba agi pa temulung shiranger, ta ashi.

St. Peter's Square nung Amungnü nisung meyirijang aika den jembiba mapang Pope-i Worldwide Network of Prayer app ya sayaja liasü.

Iba app tasenba dang ya Click to Pray ta ajar aser iba ajanga app amshir dang alima nung Roman Catholic nütsüng billion 1.3 indang lenir ya alima nung yimjung alitsü mesüra alimar yimya agi linük balala nem teraksa bener arutsüba amala atema sarasademba metetdaktsütsü.

Francis shibai mapang ka pa ya technology tsütsü kanga timtemer ta shia liasü, pai putir kati pa atema tablet bena alileni meyipa "Ni iba mapa ya inyaktsü asü? ta asüngdang. Putiri tekolak angentem.

Vatican-i sangdong ka ajanga ashiba agi, www.clicktopray.org website ajanga tamangertem ya pope den külemi alima atema sarasademba nung shilem agitettsü. Iba app ya mesayatsü tsüngta pope-i nüburtem dang, "Tanü kü mulungjang nung tejashi ana lir. Colombia aser Mediterranean," ta ashu.

"Mediterranean nung asür 170 atema ni bilemer. Parnok ya parnok tarutsü atema rangloker liasü aser parnok ya nisung shibelener kabu nung ashi. Parnok atema aser lendong atalokdaktsür atema asenoki sarasademtsüdi," ta pai ashi.

Migrant tem ya Libya aser Morocco nungi apuso aser Mediterranean nung sama ta amanger.

Colombia nung lendong atalokba indang jembidang Yangtepnü police academy nung gari bomb agi nisung 21 taküm samatsü aser aika yirutsüba ya kiralongrar mapa, ta ashi.

Iba lendong ya ELN teloki inyak, ta Colombia Tir Ivan Duque-i ashi.

Angami Christian Revival lanurtem hon jubilee amungtsü

Kohima, Aenjeti/Jan. 22 (TYO): D Khel (Seikhasou) Ground, Kohima village nung Aenjeti/January 25 nü Angami Christian Revival Youth Association (ACRYA) Hon jubilee benjongmung amungtsü sentong lir, kong delegates 5000 shi arua adentsü imlar.

ACRYA ya iba sentong asoshi kanga mazüngi renemshiba mapang lir aser benjong ya "The Lord has done great things for us, and we are filled with joy" - Psalm 123:3 nung amendaker CRC Kohima Village ajanga ayonga amungtsü.

Sentong agitsüba tesem nungi osangbener den jembiba mapang, Chakhro Christian Revival Youth Fellowship (CCRYF), Southern Angami

Youth Union - CRC, Northern Angami CRYF, Western Angami CRYF aser Kohima Town CRYF kohima aser Dimapur ama Angami Christian Revival Church 96 nungi delegates 5000 shi arua iba jubilee mung amungtsü imlar, ta organizing committee convener Neikuosielie Rhipfü, ACRYA tir Kikroneilie Yiese aser ketdangsertemi ashi.

Iba benjongmung nung tongti o jembirtemji, Mission Director NEI-CRC Rev. Dr. Neivotsu Neikha, NCRC tir Rev. Dr. Neikedozo Paphino aser Travelling Pastor Naga Hospital Colony CRC Kehoulelie Zatsu nungertem alitsü aser shisalen sayurtemji Class-I Contractor Vilelie Khamo, Deputy Director

Veterinary & Animal Husbandry Dr. Kikrukuolie Kire, Pusanyü Rüpreo aser Neisevo-ü Linyü nungertem alitsü, ta Neikuosielie Rhipfü-i ashi.

Iba benjongmung mapang Aenjeti/January 25 nü nikongdang 2:00 ako nung Chairman Angami Christian Revival Churches Council Rev. Dr. Visielie Soliezou-i ACRC Mission Centre nung nüngshilong ka azüngtsütsü aser sentong ya D Khel Ground nung nikongdang 4:30 ako nungi tezüktsü, ta benjongmung ketdangsertemi ashi.

Maneni parnokisa tamangertem ajak dang iba benjongmung külemi munga temoatsü angutsü shia liasü.

OLONG PAITEP # 5005

	1			2		3		4		
	5									
						6				7
8				9						
10		11		12						
									13	
				14		15		16		
17										
				18						
19										

TIPILEN		LANGTSÜNGLEN	
3. Tai atok	- (5)	1. Kijasor	- (5)
5. Tanur tebur	- (6)	2. Tetsüng-i ao	- (4)
6. Temeshipur li	- (5)	3. Tajungba asütsü merang	- (6)
8. Ola tashi-i adok	- (3)	4. Temokong masü	- (6)
9. Mitsü agi akümba	- (3)	7. Temeten abenba	- (4)
11. Lung nung tapok	- (7)	10. Te _ _ _ _ a	- (4)
14. Aginüdaktsü	- (3)	11. Kuo mali	- (6)
16. A _ _ _ tsü	- (3)	12. Tzü mamongba tou ka	- (6)
17. Maginü/Mesaklok	- (3)	13. Tsük asendak	- (5)
18. Tenük majung	- (6)	15. Jenti	- (4)
19. Teinyaktsü latetta ayuba	- (5)		

OLONG PAITEP # 5004 TELANGZÜBA

TIPILEN :		LANGTSÜNGLEN :	
1. Ber, 5. Renem, 6. Lemluwa,		1. Bilemtet, 2. Ramen, 3. Alu, 4. Anüra,	
7. Jarem, 10. Anüng, 13. Tzüla,		5. Rajang, 8. Mangdang, 9. Angati,	
14. Tesüiba, 16. Okshi, 17. Ang.		11. Süksa, 12. Agima, 15. Sen	



AOR LANUR TELOK KA SHISATOKDEN AKAR :

- O - Nir** : Asenoki sentongji tenzükdü...Nenok ajaki pei pei asüngdangnüba asüngdangang... Ajiser Tongti o jembir-i rateta ashitsü ta südi.
- Alokba** : Tangar kin-i Aor kar dak tamajung inyakra Aor-i mela-mela tatok agütsür...Saka asen pei kin Aor dangbo tai matoker...Ya kechiba?
- O jembir** : Waaa... Aor-ji tangar asoshi tajung... Saka pei atemabo majung adi.
- Warakla** : Tangar kin denbo tai-tatok agütsütepa yimjung yanglur... Saka asen alidak pei kin aser adianu denbo yimjung nung malir...Ya kechiba?
- O jembir** : Waaa...Pei kin aser pei adianu külemi alirtem tang nungibo tangar kinji jenjang kanga agi tuluba amai züngshir asütsü adi.
- Watsula** : Arogo ya-bo ajak tsütsü tajung ser yimjung yanglur asütsüla...Saka asen lokti raksa-a yur Arogo-i kechiba ola madoki repranger akaa?
- O jembir** : Waaa... Ashiko shibai metet lokti raksadakji Arogo-ia shilem agia dena lira... Arogo-i kodaser yimjung yanglutsü...!!!!???

~ Lilir - SMS.

TANÜBO NAI LANGZÜANG

Q. Koba yimti nung World Economic Forum (WEF) senden tenzüka liasü?

- 1. London
- 2. Berlin
- 3. Paris
- 4. Davos

_____ (Taruba adok nung onoki langzüsü)

YASHI ADOK TELANGZÜBA : Stefan Lofven

Happy Birthday

TENUNG : IMLIJUNG

Tasoba Anogo : 24-01-2010

Kum : 9

Talidak : Ungma Village, Mokokchung

Temeim Jala, Imlijung Tasoba Anogo Tsungremi

Moajang...



- From Loving Family Members

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?

1. Na mejangdang mapang ka nung teni kongka aser pungmangtsü makok.
2. Alima indang chewing gum tejentiba ya küm 9,000 dak tema asütsü.
3. Sloth atema mile ka aotsüji ita ka agitsü.
4. Blueberry süngjang ya süngdong nungi aongba sülen ang amener.
5. Alima nung kodanga meraksaba chiyongtsüji ninang mochitzü lir.
6. Avocado süngjang ya ozütem atema meim süngjang ka lir.
7. Ostrich tebong yagi molusüngzü ama arürtetter.
8. Mountain lion temi whistle aputetter.
9. Asen temang shilem nung temeli ya tashitaittiba asütsü.
10. Tepo meyuba mozü "Colgate" ya Spain nunger oshi nung "go hang yourself" (Nü sasa aletsettang) ta meyipzöker.

SUDOKU # 5051

TELANGZUBA # 5050

4	5		7	1		3			4	9	7	6	3	2	1	8	5
2	1	7		8	3	9		4	6	1	8	5	7	9	2	3	4
6	3			4	5			2	5	3	2	8	4	1	7	9	6
5		4	1	3	7			6	2	5	9	3	8	6	4	1	7
	2	1	4		9				7	6	1	9	2	4	8	5	3
			5				3		8	4	3	1	5	7	6	2	9
	7	3	2			8	4	9	3	2	6	7	1	5	9	4	8
	6	5				1			9	8	4	2	6	3	5	7	1
			3			6			1	7	5	4	9	8	3	6	2

OJANG LUTEP # 4601

- EASN : □□□□
- KÜTAM : □□□□□
- NGNU : □□□□
- EMMEDER : □□□□□□□
- JUNTAG : □□□□□□
- TETYIMTA : □□□□□□□
- AÜJYUTSI : □□□□□□□□
- GAKAN : □□□□□
- GTTONIBANG : □□□□□□□□□□
- ILR : □□□

OJANG LUTEP TELANGZÜBA # 4600


NAI JANGRA INYAKBA MAPA AJAKJITIM MAPA INYAKER AMA MEBILEMETSÜLA

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnok ashijai shidak asü tai'ar nai-a na asoba ita anogo den tanü nü tia medem dangang (Horoscope):



Aries
21/3-19/4

Shisabulu ajak anogo tom tashi nung süngjema akümtsü. Nikong dang senotsü dak sentakba mapa kar inyaktüsü akok. Mapa nung temelenshi kar adoktsü akok.



Taurus
20/4-20/5

Na aienlen liaka yangji tesentaktep tajung yutettsü. Nü shisa ajem nisung kar ajurutsü akok. Anep dang tetsüdaktsü aludang temulung ajema malitsüla.



Gemini
21/5-20/6

Nü mapa nung tangari achiteta temelenshi adoktsü. Nai tangar nem shisa tajung agütsütettsü. Tesentaktep putepa litetba ajanga nü mapa takok ngua inyaktettsü.



Cancer
21/6-7

Nü tarutsü lenmangtem nai jangja metettsü. Nai bilemba ajakji nü nüngdaktem asütsü. Tangar dang nungia shisa agitsü merangtsüla.



Leo
23/7-22/8

Tanep na maongka tajung aika angutsü akok. Teti inyakba mapa nung na kanga yakyaka alitsü. Business mapa ajak kijai inyak tajungba asütsü.



Virgo
23/8-22/9

Mapa tila nung süaka temulung kanga agütsütsüla. Nai ajangshibatem agi tebilemtsü tila akoktsü merangtsüla. Nü rongsen kettsüng tsütsü temulung agütsütsü nüngdak.



Libra
23/9-22/10

Tanü na atema anogo tajung asütsü. Tanü temoatsü anguba nai pela agitsü. Olemtep kar kanga takok ngua agitettsü.



Scorpio
23/10-21/11

Tanep nür kinünger den sensak asemtsü anogo tajung asütsü. Kibong nung nüngdakba kar takok ngua inyaktettsü akok. Tanü züluzüpong nung mashi sign masütsüla.



Sagittarius
22/11-21/12

Anep dang business olemtep takok ngua agitettsü. Kibong nüngdak kar ataloktsü akok. Tanur temang anepalutsü asoshi mozü meteterem den ajuruteptsüla.



Capricorn
22/12-19/1

Tanü anogo tom tashi teti inyakba mapa nung mazüngtsü. Nai tangar atema mapa kar inyaktüsü akok. Anü lur külen kibong nung mangatettep adoktsü akok.



Aquarius
20/1-18/2

Nü shisatsü agi na anisatsü akok. Nai mapa ajak tangsa tang tembangnütsü. Nü tesentaktep kar raksaba ajanga lendongi aitsü akok.



Pisces
19/2-20/3

Nai meimertem nem parnok tebilemba lemsadakjang. Anep dang tsütsü nüknülar den tebilemba majemtsü akok. Nikong dang mangatettep ajak angatettepa akümtsü.

2019 Oscar nomination list Mongolbarnü sangdongogo

Aenjeti/January 23, 2019

(Agencies): Mongolbarnü Academy of Motion Picture Arts and Sciences puri taküm Oscars nomination list sangdongogo, aser Roma o The Favourite nati takok tajung angutsü imlar.

2019 Academy Awards ya 1980s sülen tang mezüngbuba host ka melei amungtsü koba February 24 nü ABC nung sayatsü.

2019 atema jenjang tongtibang kar nung nomination tem yamai alitsü:

Best Picture:

- * Black Panther
- * BlacKkKlansman
- * Bohemian Rhapsody
- * The Favourite
- * Green Book
- * Roma
- * Star Is Born
- * Vice
- * Actor in a Leading Role:
- * Christian Bale, Vice
- * Bradley Cooper, A Star Is Born
- * Willem Dafoe, At Eternity's Gate
- * Rami Malek, Bohemian Rhapsody
- * Viggo Mortensen, Green Book

Actress in a Leading Role:

- * Yalitza Aparicio, Roma

- * Glenn Close, The Wife
- * Olivia Colman, The Favourite
- * Lady Gaga, A Star Is Born
- * Melissa McCarthy, Can You Ever Forgive Me?

Actor in a Supporting Role:

- * Mahershala Ali, Green Book
- * Adam Driver, BlacKkKlansman
- * Sam Elliott, A Star Is Born
- * Richard E. Grant, Can You Ever Forgive Me?
- * Sam Rockwell, Vice

Actress in a Supporting Role:

- * Amy Adams, Vice
- * Marina de Távira, Roma
- * Regina King, If Beale Street Could Talk
- * Emma Stone, The Favourite
- * Rachel Weisz, The Favourite

Directing:

- * Spike Lee, BlacKkKlansman
- * Pawel Pawlikowski, Cold War
- * Yorgos Lanthimos, The Favourite
- * Alfonso Cuarón, Roma
- * Adam McKay, Vice
- * Animated Feature Film:
- * Incredibles 2, Brad Bird
- * Isle of Dogs, Wes Anderson
- * Mirai, Mamoru Hosoda
- * Ralph Breaks the Internet; Rich Moore, Phil Johnston

- * Spider-Man: Into the Spider-Verse; Bob Persichetti, Peter Ramsey, Rodney Rothman

Animated Short Film:

- * Animal Behaviour; Alison Snowden, David Fine
- * Bao, Domee Shi
- * Late Afternoon, Louise Bagnall
- * One Small Step; Andrew Chesworth, Bobby Pontillas
- * Weekends, Trevor Jimenez

Documentary (Feature):

- * Free Solo; Jimmy Chin, Elizabeth Chai Vasarhelyi
- * Hale County This Morning, This Evening, RaMell Ross
- * Minding the Gap, Bing Liu
- * Of Fathers and Sons, Talal Derki
- * RBG; Betsy West, Julie Cohen

Short Film (Live Action):

- * Detainment, Vincent Lambe
- * Fauve, Jeremy Comte
- * Marguerite, Marianne Farley
- * Mother, Rodrigo Sorogoyen
- * Skin, Guy Nattiv
- * Foreign Language Film:
- * Capernaum (Lebanon)
- * Cold War (Poland)
- * Never Look Away (Germany)
- * Roma (Mexico)
- * Shoplifters (Japan)

Pandya mepetmesü nung aliba indang Karan-i jembi



KL Rahul & Karan Joha

Aenjeti/January 23, 2019

(Agencies): Koffee with Karan ya entertainment circuit nung chat show rongnung ka lir, kong tashishitsü akteba onük aika benoka jembiir saka asaya menü dak atemer kangabo süoiki ia magir. Ajisüaka tang tesayudak aliba season episode ka nung mepetmesü adoka lir.

Cricketer Hardik Pandya aser KL Rahul na adokba episode ya sayaba sülen nungi mepetmesü aika adoka arudar. Iba show ya aikati aitsüba den cricket asayar ana ya asaya nungi anentsüogo, saka iba

show host Karan Johar-i ola madoki liogo.

Ajisüaka tang Karan-i iba ken o indang jembiogo. Pai iba show nung atalokba khuret abenba lemsatepa liasü.

ET Now den sensaksem ka nung arishi küm 46 tain film yanglur yagi ashiba agi, "ni iba ya kü khuret ta bilemer kechiyong iba ya kü show lir. NI tena guest ama jaok anungji show nung atalokba ajakji kü khuret lir. Ni iba ya kodaser metongshitettsü, shiba kü dang angatsü? ta bilema aonung aika memejangi süidaktsüogo saka

tangbo iba ya mazioktetsüsa kümogo."

Karan-isa, "ni kü sasa ni pukemer masü saka ni tena dang tetsürtem dang dena tangar dang asüngdangba tasüngdangba tem dang asüngdang. Deepika (Padukone) aser Alia (Bhatt) nata iba show-i aruogo aser ni tena danga kasa tasüngdangba asüngdanga liasü. Telangzüba agütsüba yabo ni mazioktetsü," ta ashi.

Maneni cricket asayar ana dak atalokba indang jembiindang Karan-i ashiba agi, "tena dak kechi atalokogo iba atema ni kanga sasar."

Paisa ashiba agi, pai parnok tsüngda sensaksemba pusema nokdaker masü. "Show nung meshidaki jembiir alitsü akok aser iba atema ni tatok meshir kechiyong iba ka kü indang show nung atalok. Tena nem temerenshi peria agütsür amai nibo bilemer," ta karan-i ashi.

Show sayuba sülen Hardik-i yakta dang Instagram ajanga tatok meshia liasü. Iba mepetmesü adokba sülen Hardik aser KL Rahul na Australia den ODI series nungi anitet.

TAN HOPTA ATEMA - KOMA SÜLA ?

Q. Citizenship (Amendment) Bill ya temzüng ozüng küma latet nunga Nagaland tia koma süla ?

Olong 20 shi nung January 25, 2019 tashi nung iba telangzüba ya onok dangi (e-mail - tiryimiyim@gmail.com) : (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

Tata Harrier SUV India nung sayaogo



Aenjeti/January 23

(Agencies): Tata Motors-i kanga dang yongya ataba SUV - Tata Harrier January 23, 2019 nü India nung sayaogo; gari jenjang ya sen lakh 12.69 Lakh (ex-showroom, Mumbai) agi tenzuka angutsü.

Iba premium SUV ya Tata Motors indang flagship gari ka aser IMPACT Design 2.0 nung ajemdaker yangluba model ka asütsü. Iba den külemi, Harrier SUV ya variant balala den top spec model ka densema angutsü koba jenjang lakh 16.25 (ex-showroom, Mumbai) asütsü.

Tata Harrier variant telemsa jenjang (ex-showroom, Mumbai) yamai alitsü:

* Tata Harrier XE: Lakh 12.69

* Tata Harrier XM: Lakh 13.75

* Tata Harrier XT: Lakh 14.95

* Tata Harrier XZ: Lakh 16.25

Tang Harrier SUV tasenba nung 'Optimal Modular Efficient Global Advanced' Architecture inoksema yanglutsü. Iba ya nungtugu Land Rover D8 architecture nung amendaker aser Jaguar Land Rover den longjema yanglua liasü. Gari tejken, dual tone bumper den satin silver chin guard, xenon HID projector headlamps aser dual function LED DRLs den indicator tem keta aliba angutsü.

Tata SUV nung Kryotec 2.0 diesel engine amenoka yanglutsü aser engine ajanga 140 PS power aser 350 Nm torque agütsür. Iba den yarisentsü asoshi Engine nung 6-speed manual transmission keta lir. Gari nung mode asem-Eco, City aser Sport inoka

yanglutsü koba ESP den sentaktepa lir.

Cabin tsütsü, iba SUV nung oak brown interior color scheme den soft-touch dashboard aser leather steering wheel, door pad aser seat upholstery tem inoka yanglutsüogo. Iba den külemi gari nung 8.8-inch touchscreen infotainment system den 9 JBL audio speaker keta aliba angutsü.

Ajisüaka, iba infotainment system yagi Apple CarPlay aser Android Auto support masur saka tarutsü nung Tata-i iba feature inoktsütsü atema metetdakja liasü. Iba SUV nungsa automatic temperature control den HVAC, rear AC vents, push button start, 8 way adjustable driver seat aser tanga feature tem talisa cooled storage box tem keta lir.

Tekümzüksü atema, gari nung airbag 6 aser advanced electronic stability program (ESP) den function talilatem talisa - ABS den EBD, Electronic Traction Control, Electronic Stability Control, Hill Hold Control, Hill Descent Control, Hydraulic Brake Assist aser tanga aika keta aliba angutsü.

India shishilembadak, Tata Harrier SUV yagi Hyundai Creta, Jeep Compass aser Nissan Kicks garitem den toktepsü.

Isle of Wight Festival nung Gallagher, Ezra aser Biffy temi shilem agitsü



Aenjeti/January 23

(Agencies): Taküm küm indang Isle of Wight Festival sentong nung kentener Noel Gallagher indang High Flying Birds telok, George Ezra aser Biffy Clyro nungeri shilem agitsü ternemba lir.

Taoba Oasis telok nungi kentener Gallagher aser pa indang band yagi mezüng festival aonung shilem agitsü. Iba music festival sentong ya Newport kübok Seaclose Park tesem nung Aami 14, 2019 Hokolbarnü agitsü; aser Noel'er teloki 2012 küm kasa sentong nung shilem agiba sülen tan agi mezüng shilem

agitsü renema lir.

Honibar aonung festival mapang George-i sabang nung shilem agitsü aser iba sentong nung adentsü maongka anguba atema George-i pelaba lemsatepogo.

Takok tulu anguba ken - 'Shotgun' atensang George-i ashiba agi, "The Isle of Wight Festival nung nung shilem agir ita 18 jungogo saka mapang talangka atema iba sentong nung shilem magi ama ni bilemer."

Kasa sentong nung Simon Neil aser par telok Biffy Clyro-i festival tatem

aonung, Aami 16, 2019 Deobarnü shilem agitsü.

"Isle of Wight Festival sentong nung tanaben shilem agitsü maongka anguba atema onok kanga dang pelar," ta Simon-i ashi.

Item kentener dak alaka, music festival sentong nung Fatboy Slim-i mezüng shilem agiba angutsü. Iba den külemi, anogo asem tashi ayonga agitsü aliba sentong nung Richard Ashcroft, Lily Allen, Anne-Marie, Bastille, Courteeners, Madness, Miles Kane, Mystery Jets, Rick Astley, Plus Jess Glynne aser Jax Jones nungeri shilem agitsü renema lir.

Kasa mapang taküm küm BRITs Critics' Choice angur Sam Fender, Australian rockers DMA'S, singer/songwriter Freya Ridings, indie stars IDLES, 'Sucker Punch' ken atenla Sigrid aser 'Leave a Light On' atensang Tom Walker nungeri shilem agitsü.

Taküm küm sentong nung Hacienda Classical, DJ Graeme Park, Executive Producer Peter Hook (Joy Division, New Order) aser Musical Director Tim Crooks nunger aruagi adentsü.

'Lego Movie 2' Tsüklai 8 nü sayatsü

Aenjeti/January 23

(Agencies): Chris Pratt indang 'The LEGO Movie 2: The Second Part' film ya Tsüklai/February 8, 2019 nü India nung sayatsü ternemba lir.

Iba standalone adventure film ya original 'The Lego Movie' den tatongtep asütsü. Film tasenba nung Lego indang eclectic gang aser Bricksburg nung hero tem longjema par yimti kümzüksü atema raraba

indang asütsü.

Film nung, Pratt-i Master Builder Emmet Brickowski den Rex Dangervest ola shilem agiba angutsü. Tiffany Haddish-i Queen Watevra W-Nabi den Will Arnett-i Batman, Channing Tatum-i Superman, Jonah Hill-i Green Lantern, aser 'Brooklyn Nine-Nine' nung shilem agila Stephanie Beatriz-i Sweet Mayhem shilem agiba angutsü.

'The Sopranos' prequel nung Michael adentsü



Michael Gandolfini

Aenjeti/January 23

(Agencies): Actor aser asür James Gandolfini'er jabaso Michael Gandolfini-i 'The Many Saints of Newark' nung Tony Soprano asangwa shilem agitsü ternemba lir.

Taruba film ya 'The Sopranos' den tatongtep film ka asütsü. Gandolfini, shiba 2013 küm temulungjang tashidak agi asü, pai 'Soprano' film nung shilem agiba ajanga nungtugu küma liasü.

1999 nungi tenzuka 2007 küm tashi atongtepa yanglua aruba crime drama film nung James-i tongti shilem agi aser film ajanga Primetime Emmy Award 21 tashi nguogo.

Arishi küm 19 tain Michael-i tawa sayaba film 'The Deuce' nung shilem agiogo. Iba denji külemi 'Ocean's Eight' film nunga Michael-isa shilem tilaka agia liasü, ta osang ajanga metetdakja liasü.

Iba prequel film ya Alan Taylor-i direct asütsü. Film atema David Chase aser Lawrence Konner nati script zülutsüogo. Kasa mapang Chase-i Nicole Lambert den film produce asütsü.

Michael den külemi, Alessandro Nivola, Vera Farmiga, Jon Bernthal, Corey Stoll aser Billy Magnussen nungeri shilem agitsü.

Honor View20 sangdongogo

Aenjeti/January 23

(Agencies): France yimtiba Paris nung sentong ka agiba mapang Huawei sub-brand Honor-i View20 sayaba sangdonga liasü. Iba handset ya Honor View20 indang global variant ka asütsü koba taoba küm China nung saya liasü aser handset selfie camera nung punch-hole camera keta aliba ya alima nung mezüng smartphone ka asütsü.

View20 tejaklen design balaka, 48MP IMX586 camera keta aliba angutsü koba Sony-i yanglutsü aser tesülen secondary ToF (Time of Flight) sensor ka keta alir. Iba dak alaka, handset nung 4000mAh battery, GPU Turbo 2.0 aser HiSilicon Kirin 980 processor densema lir.

Honor View20 6GB/128GB version jenjang sen 46,900 aser 8GB.246GB Moschino variant atema sen 52,500 nungi tenzuka angutsü. 6GB/128GB variant ya Midnight Black aser

Sapphire Blue aser Moschino 8GB/256GB variant ya Phantom Blue aser Phantom Red sentsü nung angutsü.

India nung iba smartphone ya HiHonor.com aser Amazon India ajanga jelia mekaa ayutsü atema lapoktsüogo.

Honor View20 nung tongtimbang feature kaji punch-hole display keta alibaji asütsü koba company-i 'Hole-Punch' ta nungja agütsüogo. Handset ya Android 9.0 Pie nung amendaker yanguba Magic UI 2.0 ajanga run asütsü. View20 nung shilem 91.82 screen-to-body ratio den 19:5:9 aspect ratio aser 5.4-inch Full HD+ TFT LCD All-View display keta lir; aser pixel density 398ppi asütsü. Handset nung octa-core HiSilicon Kirin 980 SoC inoka lir koba 7nm process nung amendaker yanglutsüogo.

Item feature dak alaka, View 20 handset nung liquid cooling system keta aliba angutsü.



Chennai (Tamil Nadu), January 23, 2019: Tanü Chennai nung aliba Trade Centre nung 2buba Global Investors Meet (GIM) 2019 senden nung Union Defence Minister, Nirmala Sitharaman, Tamil Nadu Chief Minister, Edappadi K Palaniswami aser Deputy Chief Minister O. Panneerselvam nunger adenba noksa nung angur.

PM Modi-i Bose, Jallianwala Bagh museums semzüksüogo

New Delhi, January 23 (Agencies): Tanü Red Fort nung Ato kilonser, Narendra Modi-i Subhash Chandra Bose museum semzüksüogo; Bose sor küm 122 ajungba nungtem nung iba museum semzükogo.

Ato kilonser, Modi-isa Yaad-e-Jallian Museum (Jallianwala Bagh aser World War I museum), 1857- küm India nungeri mezüngbuba nüchiso atema raraba museum aser Drishyakala-Museum on Indian Art semzüksü.

Red Fort complex nung aliba museums ajak dangji 'Kranti Mandir' ta ajatsü, aser iba ya nüchiso atema rarartem nem tetushi agutsüba temaitsü

asütsü, ta Modi-i twitter ajanga metetdaksü.

Bose aser Indian National Army museums nungji Netaji aser INA dak sendakba nungshi osettem sayatsü aser item rongnung Bose-i amshiba menden den noklangnok, medals, badges, uniforms aser INA dak sendakba nungshi osettem lir. Ano documentary ka ajanga museums semdangertemi Bose aser INA indang taliba metettsü. Actor Abhishek Bachchan indang ola-a documentary nungji amshia lir.

Yaad-e-Jallian Museum nungji April 13, 1919 nü atalokba Jallianwala Bagh indang tejangja shia lir.

Iba museum ajanga World War-I mapang nung India nunger sepaitemi tenla agütsüba aser tasü itta raraba sayatsü.

Ano Sarojini Naidu-i World War I mapang nung India nungeri British yimli atema raratsüba indang sangro ka züluba museum nungji yua lir. 'The Gift' ta ajaba sangro jagi First World War mapang nung India nunger sepa million 1.5-i tenla agutsüba indang shia lir.

Drishyakala- Exhibition on Indian Art ajanga Aso 16buba nungi India nunger nüchiso anguba mapang tashi indang art sayatsü. Item rongnung Amrita Shergil aser Raja Ravi Varma na indang arts densema lir.

ISRO-i India nunger kaketshirtemi yangluba Satellite yoktsü

New Delhi, January 23 (Agencies): ISRO-i tang mezüng India nunger kaketshirtemi yangluba satellite 'Kalamsat' anüngi yoktsü.

Brihostibar aonung India nunger rocket ka nung Defence Research and Development Organisation (DRDO) indang Microsat R imaging satellite aser Kalamsat student satellite na densemer yoktsü, ta tanü Indian space agency nungi official kati metetdaksü.

"PSLV (Polar Satellite Launch Vehicle) rocket khaketsütsü 'countdown' ji

tanü (Bodhbar) tenzüksü," ta ketdangseri metetdaksü.

Iba rocket ji Brihostibar aonung 11:40 ako meta khaketsütsü.

"Onoki seret 700 indang Microsat R aser Kalamsat na PSLV tasen ka den khaketsütsü. Touzük ajemtsü atema tang mezüng stage pezübuba nung aluminium ka amshitsü," ta ISRO Chairman K. Sivan-i metetdaksü.

Paisa, Kalamsat ya kaketshirtem aser Chennai nung amenoka aliba Space Kidz India-i yanglu, ta shisem.

Rocket ji minute 14 shi khaketsüba sülen kilometer 277 shi nung Microsat R 'eject' sütsütsü.

"Kalamsat ya 10cm cube nano-satellite ka lir aser touzükji seret 1.2 shi lir. Iba satellite taküm alitsü mapangji ita ana shi lir aser iba satellite ya sen lakh 12 shi indoka yangluogo," ta Space Kidz India tentetsang aser CEO, Srimathy Kesan-i metetdaksü.

Space Kidz India-i India nunger kaketshirtem atema art, science aser culture ajungkettsür.



Mumbai, January 23, 2019: Tanü Mumbai yimti kübok Dadar nung Mayor indang bungalow ali Balasaheb Thackeray memorial committee nem bendanga agutsüba sentong nung Maharashtra Chief Minister Devendra Fadnavis, Shiv Sena tongti lenir Uddhav Thackeray, Mumbai Mayor Vishwanath Mahadeshwar, Shiv Sena youth wing tongti, Aditya Thackeray aser tangartem tangokba noksa nung angur.

Priyanka shimba ajanga Rahul-i tamakok anguba kuli sayur: BJP

New Delhi, January 23 (Agencies): Mapang talangka nungi Congress Party Tir, Rahul Gandhi teno, Priyanka Gandhi-i yimtenren nung ajemoktsüa akok ta jembia aruba sülen tanü lai yimtenren nung ajemokogo.

Tanü Congress-i la Uttar Pradesh East nung General Secretary shim. April-May ita nung Lok Sabha Election agitsü lia lai yimtenren nung ajemokogo.

Iba osang sangdongba sülen BJP lenir aikati Congress party aitsüogo.

Lai yimtenren nung ajemokba ajanga taruba Lok Sabha election nung BJP-i timtem ajurutsü asü? ta asüngdangba langzüdang BJP otongdar, Sambit Patra-i, "Iba ya BJP atema tayongzükba ka masü. Iba ya imlaa liasü. Iba ya kibong ka yimtenren, aser iba ya ajanga Rahul Gandhi-i tamakok anguba kuli sayur. Tarutsü nung Robert Vadra (Priyanka kinüngbu)-ia

yimtenren nung ajemoktsü. Gandhi tem ang party Tir akumtsü akok," ta ashi.

Uttar Pradesh Deputy Chief Minister, Dinesh Sharma-ia, Priyanka shimba ajanga UP aser ajaklen yimtenren nung temelenshi malitsü, ta ashi. "2014 küm election nung lai menden 46 atema nübo yimtsü, saka party-i menden 2 nung ang takok angu," ta pai ashi.

Ano BJP lenir, Babul Supriyo-i, "Iba ya Congress telung inyakyim ka lir. Küm aika iba ya imlaa liasü, aser tanü lai yimtenren nung ajemokogo," ta ashi. "Iba ya ajanga temelenshi adoktsü ta jembibaji democracy den mapet. Iba nisungi (Priyanka) yimtenren indang kecha memetet, ajisüaka ajungbena menden tulu ka asoshi la shimogo," ta paisa ashi.

BJP lenir aser Minister of State for Culture & Tourism and Civil Aviation, Mahesh Sharma-ia, "Iba ya imlaa liasü. Yangi kecha tasen mali," ta ashi.

SP aser BSP na den akokba tashi yariteptsü melunga lir: Rahul Gandhi



Lucknow (Uttar Pradesh), January 23, 2019: Tanü Lucknow yimti nung Congress Tir, Rahul Gandhi, Chaudhary Charan Singh International Airport tonga arudang party nung inyaktertem aser lenirtemi pa agizükba noksa nung angur.

Amethi (Uttar Pradesh) January 23 (Agencies): Regional party tem- Samajwadi Party (SP) aser Bahujan Samaj Party (BSP) nati Uttar Pradesh nung taruba Lok Sabha election teloktep nung Congress sendokogo, ajisüaka tanü Congress party Tir, Rahul Gandhi-i, SP aser BSP na den yariteptsü melunga dang lir, ta metetdaksü.

Tanü Amethi (Uttar Pradesh) nung osangbenertem den jembidang Rahul-i, "Ni Mayawati aser Akhilesh na kanga akhümsübur. Onok party balala süaka tangatetba aika mesüktepa lir. Onokisa BJP anema rarar, anungji onoki parnok den akokba tashi yariteptsü melunga lir," ta metetdaksü.

UP nung SP aser BSP nati taruba election atema parnok loktepba osang sangdongba sülen anogo ka lir January 12

nü Congress-i, party-i UP nung Lok Sabha menden 80 prongla nungi tokteptsü, ta metetdakja liasü.

Congress national general secretary, Ghulam Nabi Azad-i, iba teloktepi ajanga party ajangzüksü, ta jembia liasü.

January 13 nü Azad-i, "Teloktep ka yanglu asübo onoki menden 20-25 nung tokteptsü liasü, ajisüaka tangbo onoki menden ajak nungi tokteptsü," ta metetdaksü.

SP-BSP teloktepi Amethi aser Rae Bareilly menden nabo Congress nem toktsü. Iba menden ana ya Rahul Gandhi aser Sonia Gandhi na toktepa menden lir.

Osang angazükba agi, Congress-i UP nung party tilatem den lokteptsü meranger; parnoki menden 60-65 shi nungi tokteptsü aser teloktep party tem nem tanüngba menden agutsütsü.

Thailand nung election March 24 nung agitsü



Activists aser university kaketshirtem Aenjeti/January 8, 2019 nü Bangkok nung adenshia Thailand election Tsüklai/February 24 nü agiang ta akhangba noksa nung angur.

Bangkok, Aenjeti/Jan. 23 (Agencies): Metsüremi/March 24 nü Thailand nung general election agitsü, ta ketdangsertemi Rasemnü metetdaksü aser iba election ya 2014 küm sepaitemi Yingluck Shinawatra indang civilian sorkar atsüngdokba sülen tang meztünbuba lir.

Thai nung yimten yimsüsüba nungi Shinawatra'er kin atsüngdoksü aser linük nung tarutsü nunga parnok nem yimsü mesüdaksütsü mechi sepaitemi constitution zülushi, sepaitem anema jembirtem tebang shibangtsü aser ketdangsertema sepaitem den jungtepa alirtem dang shim.

King Maha Vajiralongkorn-i election anogo lemtettsü asoshi Election Commissione nem temelaba agüja meyongnem nemer ghonda ishika lir Election

Commission ketdangsertemi, "Metsüremi/March 24 ji election anogo asütsü," ta osangbener dang ashi.

Thailand indang puti otsü ya sepaitemi tashiyim agi sorkar atsüngdokba, civilian sorkar talangka melitetba aser yimten nung mangatetep adokba agi sünga lir.

Yimtenren atema rally tajungtem ayonga tenzüka azüdokshi agisa tembangba linük nung nübuyim tenzüksü asoshi anogo ya lemtet.

Ato Kilonser Prayut Chan-o-cha indang office-i nüburtem dang yimjung nung iba election süngjema agitettsüa inyaksü ajungshi, kong nüburtem yimten mangatetep agi lakteter lir.

Mitkartem den sendaktepa aliba political party tasen aser tang tashi tashi ita aliba Shinawatra kidong nungi

lennirtem adenshia senden amen tenzüko aser parnok ato kilonser inyaksü asoshi tenüing kobi melie sangdongtsü akok.

Item rongnung nüburtemi kangabo sabua maliba Prayut ya densema lir, shibai pasasa melenshiogo ta shia tesem balala sema jajaa arudagi.

Saka pa ya Thai nungertemi mesakloker, kechiaser par linük nung rongsenketsüing jenjang tamajungba akümba, education jenjang mejungi akümba atema pai mapa balaka meinyaktet.

Iba election nungya sepaitem den toktepertemi takok ngua civilian sorkar tasen tenzüktetaka parnok timtem jenti ajurutsü, kechiaser par linük indang constitution ya mitkartem yangluba lir.

Thailand nung tesüsa election takok ngua agitetba ya 2011 kümliasü.

Iba mapang billionaire Thaksin Shinawatra tenu tanutsüla Yingluck Shinawatra-i Pheu Thai party nungi takok ngua ato kilonser aküm.

Police nungi telecom billionaire akümsang Thaksin'er sorkar ya 2006 küm sepaitemi atsüngdok aser sübokrem mapa inyakba nung aitsüba sülen 2008 küm tanga linük nung jenoka alir.

Jangotsü subsidy scheme dak sendakba ken o nung Yingluck nem obendang agütsütsü lia la ya Luroi/August 2017 nung Thailand nungi jena ao.

73 BUBA
JANGPETKONG SENSO MUNG DANG SENTONG

Nükjidong : Telongjem aser Teyaritep
Anogo : 31st Jan. 2019 – 1st Feb. 2019
Tesentepdak : Yimjenkimong

TETUSHI TEJAOKER
Wb. Temjen Imna Along Longkumer
Hon'ble Minister Higher & Technical Education Govt. of Nagaland

Wb. Dr. Longrineken
Hon'ble Advisor Law & Justice, Border Affairs, Treasuries & Accounts Govt. of Nagaland

TONGTI O JEMBIR
Wb. Temjen Toy IAS
Addl. Chief Secy. & Finance Commissioner Govt. of Nagaland

SENTONG - I

Anogo: 31st Jan. 2019 **Mapang: 5:00 PM**

Tetushi Tejaoker agizükba mapang

Menden	: Ketdangpurtem
1. Sarasademtsü	: Wb. Meren Mollier, Pastor Waromung Baptist Arogo
2. Metetpela mapang	: Tatong Tir
3. Menden Okila	: Tir JSM
4. Jangpetkong Senso Mung dang Anthem	
5. Pela-a agizükba	: Chairman Yimjenkimong Village Council
6. Tajungshi O	: Wb. Süngjemkaba Dobashi Retd. Tuli Town (7 Mins)
7. Sobaliba Ken ka	: Jangpetkong Senso Telongjem Mangkolemba
8. Tetushi Tejaoker O	: Wb. Temjen Imna Along Longkumer Hon'ble Minister Higher & Technical Education
9. Tatem Sarasadem	:

SENTONG - II

Anogo: 1st Feb. 2019 **Mapang: 9:00 AM**

Menden	: Ketdangpurtem
1. Sarasademtsü	: Wb. Rev. Ayu Pastor Dibuia Baptist Arogo
2. Tajungshi O	: Wb. Dr. M.Panger Longchar, Dimapur (7 Mins)
3. Sobaliba Ken ka	: Khar Putu Menden
4. Osangtem agitsü	: (i) General Osang (ii) Audit Osang (iii) JSM Platinum Jubilee Resolution Implementing Committee Osang
5. Onük	: Yangpong Nokdaktetba Lokti (An authentic and upright society)
Tejembir	: Wb. Temjen Toy IAS, Add. Chief Secy. & Finance Commissioner Govt. of Nagaland
6. Tatem Sarasadem	:

SENTONG - III

Anogo: 1st Feb. 2019 **Mapang: 12:00 Noon**

Menden	: Ketdangpurtem
1. Sarasademtsü	: Wb. Tia Pastor Yimjenkimong Baptist Arogo
2. Tetushi Tejaoker O	: Wb. Dr. Longrineken Hon'ble Advisor Law & Justice, Border Affairs Treasuries & Accounts Govt. of Nagaland
3. O Lemtep Mapang	:
4. Nungtet Luden Osang	:
5. Menden Tatem O	: Tir JSM
6. Tatem Sarasadem	:

INVITATION

The Department of Youth Resources & Sports, Nagaland cordially invite you to the

Inauguration of the
ASTRO TURF FOOTBALL PITCH
at Indira Gandhi Stadium, Kohima
on the 28th January 2019 at 12:00 noon
in Commemoration of the

100th
Birth Anniversary of
DR. T. AO

The Hon'ble Chief Minister of Nagaland,
Shri NEIPHIU RIO
will inaugurate the Astro Turf Football Pitch.

The programme will be followed by an exhibition match between
Chief Minister's XI and Chief Secretary's XI
to mark the Commencement of the
XXth INTER DISTRICT FOOTBALL CHAMPIONSHIP 2019,
(Dr. T. AO TROPHY)
jointly organised by the Department of Youth Resources & Sports
and The Nagaland Football Association.

- Organising Committee

VACANCY**COMMUNITY EDUCATIONAL CENTRE SOCIETY
DIMAPUR: NAGALAND**

Post	No.	Eligibility	Salary
Principal	1	<ul style="list-style-type: none"> P.G with B.Ed with 5 years experience in teaching/ academic/administration (Preferably from CBSE school). Preference will be given to married person who can relocate to Tuli with his/her family. 	Rs. 35000-40000
Math	1	B.Com/B.Sc/B. Tech/ M.Sc/M.Com with B.Ed	Rs. 18000-19000
Science	1	B.Sc/ M.Sc with B.Ed	Rs. 18000-19000
Music	1	B.A in Music/ equivalent degree/grade	Rs. 18000-19000
IT	1	B.CA/ PGDCA with B.Ed	Rs. 18000-19000
Hindi	2	Bachelor's degree in Hindi with B.Ed	Rs. 18000-19000
Physical Education	1	<ul style="list-style-type: none"> Bachelor's degree in physical education/ health fitness related subject. B.PE/ B.P Ed/ M.P Ed 	Rs. 18000-19000

• Only qualified degree holders having passion to teach can apply.
 • To be stationed at Rajeshwari Karuna School (CBSE) campus in Tuli.
 • Residential facilities will be provided in the campus.
 • Mail your Resume along with an application mentioning the preferred post to cecocietyjobs@gmail.com
 • For queries contact 03862 - 232747/224280/9366725280, Office timing: 10:00 am to 4:30 pm (Mon-Fri)
 • Last date of submission:10th Feb 2019
 • Shortlisted candidates will be called for interview at CECS Dimapur.

**Sd/-
Director**

**Kohima EAC-i
sangdonger**

Kohima, January 23 (TYO):
EAC (Estt) Kohima, Dziesengunuo Mere-i sangdong ka ajanga HODs aser AHODs den Award angutsüpur ajak dang January 24 nungi tenzüka office mapang nung Establishment Branch, Kohima nungi invitation Cards aser Car passes agizüksü metetdaksü.

**Modi tsüpuba
agi opposition
longjemer:
Smriti Irani**

Jhargram, Aenjeti/January 23 (Agencies): Kolkata rally indang opposition party tem aija/mezüngmeshia Aenjeti/January 23, 2019 Bodhbarnü Union minister Smriti Irani-i, 'lennirtem shirnoki arishi piyong kati ka anemtepa arua liasü, tang parnok ya pei pei jangraba inyaka tenzüksü aser Narendra Modi tsüngen tsüpuba ajanga külemi longjemer,' ta ashi.

"Tang West Bengal nung tensa balaka dang ajangshiogo kong nisungtem (opposition party) yimtenren sabang ka nung longjemer. Nüburtem indang terenlok maparentem nung parnok shilem kecha mali," ta BJP indang 'Ganatantra Bachao' rally sentong nung Irani-i ashi.

"Parnok (opposition lennirtem) longjemba ya Narendra Modi tsüpuba ajanga lir. Pei jangraba inyaksü asoshi parnok ya longjemer. Arishi piyong parnok ya kati ka anemtepa aruogo saka Narendra Modi-i tenzüksüba maparen nokdangtsü atema parnok ya longjemer," ta Irani-isa shisem.

Tang West Bengal Chief Minister, Mamata Banerjee-i Congress den tesendaktep yanglutsü merangba atema Irani-i menüja liasü.

LAND FOR SALE

At Shitikolng Ward, Tuli Town
Near Govt. Higher Secondary
School Tuli
Contact : 9612836509 /
9436006283

**59 Buba
Ongpangkong Mungdang**

Anogo : 29th January 2019 Mapang : 09:00 AM
Tesentepdak : Mayangnokcha Govt. H.S.S Auditorium, Mokokchung

KETDANGPURTEM

Tir : C. Angang Jamir
Tatong Tir : T.L. Yanger Imchen
Tongti zülur : L.Bendangwati
Repsem Zülur : Lipokzülü
Sen Zülur : Imnameren
Sen Repsem zülur : Sungtiwapang
Kimen : Tzuinsangba

SENTONG TARENSEN**SHILEM I**

Menden : Ketdangpurtem
1. Mungdang lapoka : Rev. Ponen Longchar, Pastor MTBA
Sarasademtsü

2. Lokti Pela- agizükba : Wb. C. Angang Jamir
Tir, Ongpangkong Mungdang
3. Ashi Akang O : Wb. Metsübo Jamir
Hon'ble Minister, Urban Development
& Municipal Affairs, Nagaland
4. Sobaliba Ken : Mokokchung Village Council
5. Onük : "Tanü aser asung Ongpangkong Tia"
Tejembir : Wb. P. Kilemsungba,
District Horticulture Officer
6. Sarasadem : Wb. Bendang Longkümer
Pastor Artang Baptist Arogo

CHIYONGBA MAPANG**SHILEM II**

Menden : Ketdangpurtem
1. Sarasademtsü : Rev. A. Nungshi, Aongza Ward
2. Osangtem agitsü : (i) Tongti zülur osang
(ii) Nungtet luden osang

3. Agenda benokba mapang :
4. O lemtepa mapang :
5. Mungdang Tezüluba azungtsü :
6. Menden tatem O :
7. Menden melentepba mapang :
8. Mungdang shibanga : Wb. Puryapang Pastor
sarasademtsü Yimyu Baptist Arogo

METETDAKTSÜR

1. Mungdang Teyimsür Ongpangkong Kaketshir Mungdang asütsü.
2. Agenda lira 27th January 2019 tashi nung ketdangpur ket tongtsütsü. Iba sulen aruba magizüktsü.
3. Onük jembiba nung mangatetba asungdangtsü mapang lapoktsütsü.
4. 2018 tashi shir yimsung aser Town unit membership magütsü ali, mungdang nung bener arutsü mepishia metetdaksür.
5. Iba sentong takok asoshi ajaki sarasadema atati.

Menungra Bilemteter

24-1-2009

24-1-2019

Late. Marsadang Ozüküm (Mongsenyimti)

Ibri 13:14 - "Kechiyong Yangi Asenok Tatem Makai Alidak Yimti Maka, Saka Asenoki Tarutsü Yimti Bushir"
Temeim Oba, na onok nungi pilar tanü küm ter (10) abensa arudang ne ajemalu yimyatem, anepalu mapa tajungtem onok den teti alir aser tensa ajak nung na lir ama bilema arur, onoki na teti menungra bilemer.

Temeim Kinungtsü, Chirnurtem, Semchir & Kinungertem.

Tenüngsang Agütsür

Wb. Moatemjen Aier (Molungyimsen) kinungtsü **Dr.Vibeituoouo Mere-i** Senate of Serampore University nungi "Family caregivers Coping with Schizophrenia and Mood Disorders in Nagaland : The Role of Pastoral Care and Counseling" onük nung Doctor of Theology (D.Th), degree ngutetba asoshi kinungertemi pelar aser la nem tenüngsang tulu agütsür.

Lai tenzüksüba wadang nung inyaka aodang Tsüngremi la len aniang aser anema aliba taküm den arishia yujang ta kinungertemi sarasadema moatsür.



OFFICE OF THE

LANGPANGKONG KAKETSHIR MONGDANG*Langpangkong Students' Conference*

H.Q. Chuchuyimlang - 798614, Dist. Mokokchung . Nagaland

TENÜNGSANG AGÜTSÜR

Langpangkong tzükong akhümtong Hon'ble Minister Wb. Tongpang Ozukum-i Adarsh Yuva Vidhayak Samman Award (Ideal Youth Legislator Award) khonang naroküm anguba asoshi Langpangkong Kaketshir Mundang ajanga pelaba den tenüngsang asen lenir nem agütsür.

Nü lenisüba nung asen lima dangi terenlok aser temelenshi arutsü LKM mendenti tamang sarasadem.

**Sd/-
Washimongsadem Longkumer
Tir, LKM**

**Sd/-
Temjentoshi
Tongti Tezülur, LKM**

**Langpangkong Tzükong
Mungdang (LTM)-i Tushir**

India lima nung kanga nungtugo konang "Aadarsh Yuva Vidhayak Samman (Ideal Youth Legislator Award)" koba Indian Students' Parliament (Bharatiya Chhatra Sansad)-i acha-ayanga MIT- World Peace University, Pune nung agütsür, iba konang naroküm Wb. Tongpang Ozukum, Minister PWD, shibai Shisashir Lokti (NSF) tenzüka aruli dang Nagaland nung Legislator aküm, Pai ngutetba asoshi LTM-i tenüngsang tetushi tulu agütsür aser asen lenir taküm ano maneni alima tenzüksü asoshi wazüka, awapanga yuang ta sarasademtsür. Iba den külemi, Wb. Sentimar, Mongsenyimti Compound, shiba North East Zone Cultural Centre, Ministry of Culture, Govt. of India kübok Guru Shishya Parampara Kendra in the field of Art (Painting), Craft & Sculpture nung GURU asütsüshim, pa aser pa mapa tajung asoshia LTM-i konang nungsang agütsür. Tarutsü anogotem nung nü wadang ano tali azükaru sudakjang ta LTM-i sarasademja atar.

**Sd/-
M. ZULU OZUKUM
President**

**Sd/-
LANU PONGEN
General Secretary**

**LONGSA MEDEMSANGER PUSO
ONGER SALANG
SANGDONGER**

Wb. Supongmeren Jamir Ex. MLA, pai Onger Salang mezüngmeshipa ajanga February 12, 2018 anogo nung Senso nungi jendoka aliba January 10, 2019 nung pa nem tatok agütsür senso nung agizükba sangdonger.

**Sd/-
Wb. T. Yashi Tatar
Chairman**

**Sd/-
Wb. L. Imdonger Tatar
Secretary**

Mezüngbuba ODI India-i wicket 8 agi kokogo



Dhawan run 50 ajungba sülen Kohli-i tenungsang agütsüba noksa nung angur

Napier, Aenjeti/January 23 (Agencies): Bodhbarnü India aser New Zealand na tsünga mezüngbuba ODI asaya India-i kokogo. India nungeri iba asaya wicket 8 agi over 34.5 nung koka liasü.

Asaya nung anü kanga sashia apuba ajanga India nunger batsmen temi ball mongui akümba sülen umpire temi asaya anendaktsü aser Duckworth-Lewis method benoka liasü. Iba amala tatalokba ya tang mezüngbuba international cricket asaya ka nung ajangshiogo.

Toss akokba sülen New

Zealand team-i over 38 nung run 157 yanglur ajak out süadok. India nunger bowler tem rongnungi spinner Kuldeep Yadav-i over 10 nung run 39 agütsür wicket 4 agi aser Mohammed Shami-i over 6 nung run 19 agütsür wicket 3 agi. Maneni leg-spinner Yuzvendra Chahal-ia wicket ana agia liasü.

New Zealand pur rongnungi Captain Kane Williamson-i run timtiba yanglu, pai ball 81 nung run 64 yanglu.

India nunger batting amenba mapang Shikhar Dhawan-i ball 103 nung out mesüi run 75 yanglu. Pai boundary trok züka

liasü.

India nungeri wicket ka out sür run 44 yanglu aliba mapang nung anü apuba ajanga ball mongui asaya anentsüsa aküm. Ghonda tesadangka tashi masayteti akümba ajanga target yanglushia India nunger nem over 49 nung run 156 arishitsü asoshi latettsü, koba parnoki ayong ayonga menepa liasü.

Chichioyngba sülen Rohit Sharma kanga kara out süadok saka Kohli aser Dhawan nati India team tejakleni ani. Kohli-i run 45 yanglur out asü. Pai ball 59 amenba mapang boundary asem azük aser iba sülen Lockie Ferguson out sütsü.

Iba asaya nung Dhawan-i ODI fifty 26buba yangluba den külemi batsmen tem rongnungi run 5000 takaratiba yangluteter pezübuba kümogo. Dhawan-i asaya 118buba nung iba alizüng tongtetogo.

Kasa mapang nung India captain Virat Kohli, New Zealand den ODI asaya tatembangbuba ana aser T20I series nung masayai anisüngzüksü asoshi temelaba agütsüba BCCI-i Bodhbarnü metetdaktsüogo.

Pa melena vice-captain Rohit Sharma-i anir January 31 aser February 3 nü ODI 4 aser 5buba aser February 6 nü nungi tenzüka T20I series asayatsü.

Djokovic, Pouille semi-i iogo: Williams tsükogo

Aenjeti/January 23, 2019 (Agencies): Mongolbarnü Australian Open tebur kija asaya nung World number one Novak Djokovic-i, Kei Nishikori madak takok ngua semi-final tongtetogo. Asaya nung Djokovic-i 6-1, 4-1 agi koka aliba mapang nung Nishikori temang nung timtem adoka masayatetsüsa akümba sülen pa asaya nungi tuguadok aser Novak-i asaya akok.

Mezüngbuba set tetenzüklen nungi Nishikori temang nung timtem adok. Medical time out ka agia minute asem tashi temang anepaluba sülen Nishikori tebi tachichilen sü agi naibanger asayai adok saka pai masayateti anen.

"Ni kanga toktepa asayaner aser talisa Kei den asayaner. Küna tsünga aiben asayaogo. Pa yakta temang tajungba akümtsü imlar aser mapang talangka masayatetsüsabo masütsü imlaa atar. Taonung

asaya tembanga masayetetba atema ajak dang tatok meshir saka nenok ajak küna asaya reprangtsü atema aruba atema kanga pelar," ta Djokovic-i ashi.

Kasa asayamung tebur kija asaya tanga ka nung France nunger asayar Lucas Pouille-i 7-6(4) 6-3 6-7(2) 6-4 agi Milos Raonic madak takok ngua mezüngbuba Grand Slam semi-final tongtetogo.

Pa semifinal nung Djokovic den asayatsü jangjaogo.

Mongolbarnü Australia open tetsür kija asaya nung Karolina Pliskova-i Serena Williams tsükdakja semifinal tongtetogo.

Williams-i round pezübuba nung world number one Simona Halep tsükdakja liasü saka Quarter final asaya nung la 6-4, 4-6, 7-5 agi Czech tsür Pliskova-i tsükdaktsüogo.

"La kanga junga asayaa liasü aser talisa tanabuba set tatemlen lai kanga junga asayaogo," ta Pliskova-i ashi.

"Ni kanga ayong ayonga asayaa liasü aser tera agi dang tamakok mangu saka tang ni takoker ka ama nokdaka lir aser kanga jangradema bilemer," ta laisa ashi.

Pliskova-i tang agi tasembenbuba ang asayamung tongtibang ka semifinal tongtetogo. Lai 2017 küm Roland Garros semifinal aser küm ka tejakdang US Open semifinal tongteta liasü kong lai Williams tsükdaktsü saka Angelique Kerber-i Final nung la koka liasü.

Maneni tetsür kija asaya nungsa Japan tsür Naomi Osaka-i Ukraine tsür Elina Svitolina 6-4, 6-1 agi koka semifinal tongtetogo.

Osaka semifinal nung Pliskova den asayatsü.

Iba takok sülen Osaka ya Japan tsür rongnungi 1994 küm Kimiko Date-i Melbourne Park semifinal tongtetba sülenbo mezüng asayar asütsü.

Wrestling asaya atema asayar shimtsü

Dimapur, Aenjeti/January 23, 2019 (TYO): Youth Resources & Sports, Director, Akumla Chuba-i sangdong ka ajanga, I.G. Stadium, Kohima, State Sports Academy nung U-14 (tetsür aser tebur) Wrestling asayar shima admission agütsüba sentong I.G. Stadium, Kohima nung January 29, 2019

nü 10:00 ako nungi tenzüksüba metetdaktsüogo.

Academy nung azüngtsü atema temalen shisema aliba arishi küm küboki aiteritem (2019 January 31 tashi nung) shimtsü aser iba atema Adhaar card den külemi Birth Certificate attested copy agütsütsü nungdaker.

Maneni application form tem Directorate/I.G. Stadium Kohima nungi office mapang meshitettsü. Selection test agiba anogo application den külemi sen 50 aser passport sized photo ana bener arutsü metetdaktsü, ta sorkar sangdong ka ajanga metetdaktsü.

Saina tanabuba round-i iogo; Praneeth, Subhankar tsükogo

Aenjeti/January 23, 2019 (Agencies): Bodhbarnü Indonesia Masters asayamung nung India tsür rongnungi asayar Saina Nehwal-i la asaya koka tanabuba round tongtetogo ajisüaka külem India nunger asayar B Sai Praneeth aser Subhankar Dey na mezüngbuba round nung tsükogo.

Saina shibai taoba hopta Malaysia Masters semifinals tonga asayaogo, la tetsür kija asaya nung set ka tesülen aliba nungi meyipa atur 7-21 21-16 21-11 agi Dinar Dyah Ayustine madak takok nguogo. Saina-i tang agi asembuba Ayustine kokogo.

Hyderabad nungi arishi küm 28 asayar ya tanabuba round nung Indonesia tsür Fitriani Fitriani den asayatsü shiba lai 4 ben tashi koka lir.

Tebur tarep asaya nung National champions Manu Attri aser B Sumeeth Reddy nati 14-21 21-19 21-15 agi Denmark nunger Mads Pieler Kolding aser Niclas Nohr na koka tanabuba round tongtetogo.

Kasa asayamung tebur kija asaya nung 2017 Singapore Open champion Praneeth 12-21 16-21 agi Olympic champion Chen Long-i tsükdaktsüogo aser Subhankar-a 14-21 21-19 15-21 agi taoba Denmark nunger World champion Viktor Axelsen-i tsükdaktsüogo.

Maneni tetsür tarep asaya nung Commonwealth Games bronze medallist Ashwini Ponnappa aser N Sikki Reddy na 14-21 14-21 agi Thailand tsür tarep Jongkolphan Kititharakul aser Rawinda Prajongjai nati tsükdaktsüogo.

2nd Lt. Limatemjen Memorial Futsal Trophy Mighty Ducks-isa benogo



2nd Lt. Limatemjen Memorial Futsal Trophy champion team 'Mighty Ducks' pur senpet agizüker külen tayonger Shooting Starz aser match official den tangokba noksa nung angur. Mokochung, January 23, 2019.

Mokokchung, JAN 23 (TYO): Shooting Starz Club-i ayongzüksüba 2nd Lt. Limatemjen Memorial Futsal trophy Jan 22 aser 23 anogo ananü yangi Mokochung Multi Sports Complex nung asaya mungogo. Taküm iba asayamung marok yaküm champion Mighty Ducks-isa benogo.

Taküm iba asayamung nung telok 11-i shilem agia liasü aser item rongnung final tashi atongerji Mighty Ducks o Sunday People na liasü. Tena final asayaba Mighty Ducks-i goal 5-2 agi Sunday People madak takok tulu angu.

Mighty Ducks nungi Toshiwapang-i goal asem agüja hat-trick jenjang angu aser par telok nungisa Menang aser Osen nati goal kaka idaktsü. Sunday People-ia aiben goal yoktsü maangka ngua liasü saka parnoki metsüba ball kar goal post tezülen ao aser kar Mighty Ducks keeper-i

nokdanga parnoki goal ana dang küpdangtet, aser goal anaji Bendangnukshi aser Arongba nati agütsü.

Champion telok nem kuli kakat den senpet sen 30,000/- aser runner up nema kuli kakat den sen 20,000/- agütsüogo. Jurila/Nija senpet Best Goal Keeper-ji Sports Association Lijaba Lijen nungi Takosunep aser Highest Scorer-ji Mighty Ducks nungi Toshiwapangi agizük. Tenaprong nem senpet sen den kuli kakat agütsü.

Lanurtem ajungshiba den parnok nem sabang lapoktsütsü aser futsal asaya tali nungtugu kümdaktsü nükjidong yur taruba küm nungibo district level nungi jenjang temaba, tajungba aser senpet-a teimba ajungkettsü tebilemba lir, ta organizing committee convener, Sanglipong-i senpet agütsüba sentong nung jembidang ashi aser paisa iba asayamung nung yariteper ajak dang pelaba lemsatop.

BILEMDANGANG

"Timla lira ajak akoktsü, saka amajok nung imlaba ajanga nisung ka telungi ludaktsütsü."